



卷一

^ 16
2414
1



和
2414
1-11

經山集總目

卷一

賦

詩

卷二

詩

卷三

詩

卷四

詩

經山集

總目



卷五

疏劄

卷六

疏劄

卷七

疏劄

卷八

疏劄

卷九

奏

啓

卷十

議

狀

卷十一

應製文

上樑文

卷十二

書

序

記

跋

卷十三

祭文

雜著

卷十四

碑銘

卷十五

碑銘

卷十六

墓碣

墓表

卷十七

誌銘

卷十八

家狀

行狀

卷十九

諡狀

卷二十

謚狀

附錄卷一

年譜

附錄卷二

行狀

附錄卷三

墓誌

墓表

教書

內下

御製

御筆

二附

不允批答

賜祭文

經山集卷一目錄

賦

留仙觀賦

皇南殿賦

金華窟賦

江都賦 并小序

詩

松坡舟中

玉井寺

夏日直堂后奉和荳溪朴承宣 宗薰 尹承宣 魚目

東 盆蓮聯句韻

賦得唐封郭子儀為汾陽王 應製

賦得三百六旬春不老 召試

芙蓉亭應製 并小賦

曬史五臺山之行到月精寺次朴府使 宗正 韻

上元寺

登大關嶺口占

觀音窟

清澗亭

九龍淵

海金剛

海山亭

榆岾嶺上

榆岾寺

隱仙臺

摩訶衍

歇惺樓

玉署直中和李友 止淵 韻

夏日適過徐友 憲輔 居仍被雨邀北隣尹戚兄

致赫 語闌遂及林泉卜居之樂朝起書此

聖上御極之九載夏旱孔酷八薦圭璧澤未洽遂
親禱雩壇靈雨滂沱恭將蕪辭聊識鄙忱雖
未能揄揚萬一而備載其時事實兼附頌禱
之辭用前百四十九韻

游西江

己巳秋以關西京試官路過松京吹笛橋

練光亭次按使徐太史榮輔韻

玉署直中賦示朴待教綺壽約會崔國寶璜宅

簡曹學士脊庵鳳振

陪家大人作成都之行登巫峰命韻

玲瓏閣

仙樓夜詠

黃鶴樓

舟下六六洞每過一洞縣吏報其名輒寫一絕

暮行

觀漁

雪曉次東坡書壁韻

爲趁正朝賀班入京數日聞嘉山土賊之變又

聞家大人以肅川兼官領軍赴安州急發到

高陽店口呼

壬申十一月 元良受冊余以問禮官啣命赴
灣府是行也節使之赴燕奏請使之歸國先
後齊會亦一時之罕遇也聚散離合之際語
多傷懷亦嫌陳腐而萍水歡會終不可無迹
以詠物體爲詩令漢叟申曰燭景博李光曰
拈坡韻善之拈以示之稚教沈象曰非癡眉
姿池乎
以太僕正懷刺謁提舉楓臯金太史祖淳于玉
壺之居公盛說壺居之勝仍命題初到玉壺
諾而未克酬也追錄爲詩分押命題四字爲

韻

次李供奉紫極宮感秋韻和楓臯先生求正
疊前韻志懷

惠慶宮挽詞

和朴荳溪

次卯君韻

從弟幼之始容進士唱名之日奉一律識喜

丙子春作順興府覲親之行宿廣州楸舍

到興州竹溪松樓皆茲州勝也

三樹亭拈韻亭先祖結城公所居

浣潭書院夜宿賦示同宗院我先祖結城公直
學公文翼公享所旁祖修撰公應教公梅塢
公石門公從享焉

慶州兄山江乘舟獵魚書贈李府尹 德鉉

宿東萊梵魚寺

入東萊府夜雨拈韻與從弟幼之地主曹脊庵

季氏蕉齋 龍振 共賦

沒雲臺呼韻共賦

留萊州七日居處舖設飲食綺羅游玩之勝俱
不可不錄效艷詞體作八絕以應蕉齋諄屬

密陽嶺南樓敬次林塘公韻

島潭

二樂樓

江行雜詠五絕

又雜詠五古二十七首紀江行

二十四峰歌

清心樓次地主呂內翰 東植 韻

中國葉東卿 志詭 宅子午泉詩應李尙書 肇源

索題盖泉以子午兩時流出故名尙書赴燕
時有求東人詩文相贈之約

戲步權彝齋敦仁賭棊詩韻

宗姪基一之吳畫師珣六疊屏畫戲題

贈上使洪判書義臣赴燕

在寧邊府陪按使斗室沈公象奎宿留仙觀泛

舟沸流次東坡遊京山五古韻

六六洞拈東坡七絕韻十首共賦

簡殷山使君朴梧墅永元

季秋爲支勅往宣川倚劔亭月夜逢斗室巡相

拈謝玄暉宣城五古韻共賦

以山蔬木杖獻思穎南相公公轍生朝效六一

集歌行體並呈

黃橋李莊館侍郎龍秀按察黃海道時故人在

藥山黃堂贈六種黃物以寓勸祝進德修業

之意演成五古以供千里一笑

經山集卷一

東萊鄭元容善之

賦

留仙觀賦

昔東明之築紇骨兮履巉巖而開宇
 巫山赫其寡仇兮吹神明之扶護
 坻流穡而沸穴兮駕雷車兮銀浦
 洞窈冥而矯蜿兮雲恍惚兮神靈
 雨續湘羣與漢珮兮動霧縠而徐
 步被明月而裳雲霓兮珥瑤琿而
 飾寶璐睂聯嬋而曼睭兮留連蜷而
 娉婷奉將憺以美居兮剡鬼斧兮
 揚靈開雲窓與霧戶兮擗蕙櫜兮
 爲



芳三百之間十二欄兮絢金碧而流光夙余願此寄
目兮撰良辰而遨遊朝秣馬於柳堤兮夕余次乎蘭
之洲溯中流而擊汰兮沛吾乘兮桂舟麟駕邈其不
可攀兮撫陳迹而懷傷何後王之逸豫兮以流連爲
自康嗟無一士之譽謬兮不箴傲而啓荒已矣乎臨
風一嘆兮聊以之兮相羊返而宿夫玄虛兮流月華
兮洞房發昔夢於瑤姬兮誦楚操於高唐神曳烟而
安歸兮橫極浦兮遙相望倏岳岳而窺窓兮託微波
兮浩倡欲令青鳥爲媒兮把瓊芳而彷徨夜參半而
不寐兮巫水碧兮巫山蒼

皇南殿賦

殿奉新羅敬
順王影幘

水有苞而原有瓜兮赫居御宇而靈長金鷄唱於始
林兮氏中葉而毓祥龜洛食而宅周兮駟社降而啓
商括浪沮之豐壤兮据辰卞而爲疆謀臣雲集而猛
士風掣兮固局鏑於金湯逮明哀之棄三風兮蕩鮑
石而流觴隋樓迷而畫纈兮陳花艷而曲颺阿柄倒
而戈操兮猗甄跳而弓猗午祚微而胡突兮李綱頽
而藩強嘻順辟之步窘兮慟荃衷於黎傷識白水於
太原兮謠青蓋於崧陽異宋附之俶越兮非魏徙之
訾梁遷靡依於晉鄭兮讓如禪於虞唐擲神器如脫

躡兮按黃圖之芒芒開柳花而館迎兮屈青衣而悲
涼遁悵怛而服麻兮卓北地而激昂赧終替於獻地
兮亶寔仁於踰岡不有廢而孰興兮繼來許而俾昌
樂湯孫之賓鎬兮繁媯後之育姜適余駕之南馳兮
撫陳迹而彷徨望鰲峰之轟轟兮聽蚊水之湯湯鶴
夢哀於遼郭兮鸞影孤於女床問玉箱於古邱兮想
方鏡於虛堂樓臺化爲茂草兮歸獨存於靈光悲蜀
老之祠烈皇兮愴荆人之祭昭王瞻玉真於寶座兮
穆珠旒兮九章遊雲輶而月出兮靈之降思皇皇陳
簫鼓而浩唱兮雜椒蔬與丹黃邦人於戲勿替兮肅

精禋而誠將棄千乘而不戀兮保元元而靡遑藹靈
襟而罔間兮永綏福祿降民康歌曰

皇皇南殿畫丹青且蓀壁芷檠瓊木櫺且羅幃翠搖
簫彩絲且瑤席朱綴鎮玉龜且珠幘日表八彩眉且
龍袞聖帶爛蕨蕤且偃蹇倏忽靈出遊且曉次星臺
夕月丘且吉日穆愉竽瑟鼓且玉笛清亮昌郎舞且
蘭膏蕙炷華燈熒且瑟瓚雲壘桂醕馨且靈風颼颼
白馬纓且靈雨飄飄翠翡旂且綠墻隱邃幽篁叢且
紫壇嬋妍芍藥紅且衣裳清肅靈之在堂且迎神兮
娛神欣欣而樂康且

金華窟賦

余夙抱此幽賞兮乃矯翮而遐征召陽侯使先導兮
理舩艫而筭程鳴榔於北壁之滢兮鼓棹於石門之
汀軼雲駢於縣圃兮舉霞標於赤城攬秀巒之葱蒨
兮揆穹壑之窈冥匿金華之瓌譎兮拊奇紀之標名
閣孤蓬而策躡兮扈壽藤之飛莖屢屨呀而嵌空兮
鑿混沌而燔靈仇傍通而巴三闕兮儼崇楣而峙衡
鼓化鍵而煽神鞞兮鎔雲根之髓精遁禹斧於擘稽
兮跼羸鞭於駕瀛洞窳窳而窺局兮倏曛晝而瞠睛
離朱睇而瞑瞢兮般引繩而魄驚蕤櫓楸而視踐兮

紛悅裳而放絡纓缺火束而物辨兮嶠燭燃而恠呈
壁矗布而孕彩兮泄金乳之滌澗斲廉角而凝結兮
駭萬類之賦形造幻像於穀城兮仙人謬謬降霓旌
眩鮮文於支機兮蛾眉曼睩闕玉櫺振黃策而羊起
兮鳴李鏃而虎橫玄螭蟲屬並出進兮鬢鬢翾翾蟠
且停繡巘紛郁靄雲兮瑤躔纏連璨星複蕙鱗比而
蜃嘘兮耽耽疏柱而竦楹沼不浚而淥蓄兮卉匪藝
而灌縈焱瀕洞而奔馳兮忽中豁而彭亨簾輪函而
獸負兮體洪鍾之鏗錡淘殷慮而發省兮邈悟神而
如醒縱垂堂之冒戎兮判遨頭之恣情始戲劇而奇

設兮仍羽人之所經一路通於丹丘兮騁長生之福
庭招雪螭而通辭兮願騰我以瓊華玉英

江都賦

余於癸丑孟夏就養于長子基世江華府留
營暇日閱見府誌又登高眺望沿津尋覽三
面環海一面通甲津鎮堡十二墩臺五十一
包羅相望誠天設金湯之地而東國之寶也
地界東西廣四十里南北袤七十里初名甲
比古次高句麗時始置郡曰穴口高麗高宗
避蒙兵入都 我朝爲府使府尹陞留守兼

鎮撫使

闢九埏而奠三壤兮畫區野而御后王崆峒涿鹿岐
鎬洛兮屏五服而翰封疆暨候甸而固捍蔽兮楚以
荆而趙之漳綿蒼籙而定鼎兮隆上都於漢之陽峙
白岳而作墉兮注江漢而爲隍指津浦而西逸兮壯
險隘於海方昔高句之剗穴口兮拓幅員而開荒麗
駕遷而據勝兮懾蒙甲而斂鋒鋌猗籌國而石畫兮
綢桑土於金湯積瀛溟於三邊兮鯨濤蛟雨之蕩茫
環甲津於一帶兮龍艦雀舸之檣檣若黃河之爲經
兮通浙漕與閩商孰附翼而飛渡兮一人控阨萬莫

當錯繡畦又綺塍兮比井曰而翳麻桑戶絃誦而家
弓馬兮譜氏族於里坊績分司而保釐兮營鎮撫而
慮長行殿同於大內兮敞藻棟而畫樑啓雕窓而八
闕兮架甬道而曲廊煥長寧而神御兮儼 兩聖之
垂黼裳瞻寶幘而薦珊瑚璉兮奏朱瑟而陞香燦奎璧
之昭回兮建龍圖而開天章奉牙籤而璀璨兮護瑤
牒而焜煌蟠光氣於鼎足之山兮金匱石室之秘藏
列三營而森衛兮楯弩旒旒而稍槍羅六宮而固局
兮織縷鹽豉而糗糧藏天帑而掌簿兮寶器珍用之
于帑箱漢東京而宋西都兮有國長策安不忘六駕

巡於丁歲兮避囂塵於搶攘嗟維丙之國步窘兮故
老吞聲而淒傷非山谿之不險固兮豈兵甲之不精
良卓嵬節而樹風聲兮山斗之重而日星光州之鎮
曰摩尼兮俯浩滄而蟠太蒼肅檀神之祭星靈兮石
崇壇於山之岡屹雉堞而巉巖兮炳偉烈於三郎轉
法輪於前代兮開梵宇於吉祥降玉燈於金闕兮函
貝葉於經床汊港中兮如鷺尾兮竦丹檻於朝海之
傍羣峰低而雲渺渺兮遠潮平而波汪汪溯流光而
欲上下兮棹木蘭而楫沙棠藹佳麗而彌矚兮非直
爲此關防地毓靈而呈禎兮御飛龍於天閭山靄彩

而渚虹頰兮符異瑞而玄德暢黃合宮而舜總期兮
葺草蓋於帝鄉泰運回於新豐兮筮品彙之咸昌寄
留臺於鎖鑰兮政術通於弛張荻垣抗夫鐵瓮兮較
繭絲於保障關不征而市不稅兮勸耒耜而興校庠
謹覘候而組練兮修譙宇與墩墻城衆心而藏富兮
壯謀猷之允臧雖講閱之靡懈兮先撫字於居常淡
閭澤而導和氣兮皇穹佑而降康民阜物蕃長昇平
兮溢衢樽而樂穰穰

詩

松坡舟中

却下五花馬還憑一葉舟身如天上坐人在水中流
長渚鷗眠晝平沙鴈下秋風清波似練擊楫溯蘋洲

玉井寺

遊人玉井寺寺景轉清幽僧言烟際出塔影樹梢浮
深澗打鍾夕曲廊鳴葉秋高吟獨不寐待月倚高樓

夏日直堂后奉和荳溪朴承宣

宗薰

尹承宣

魯

東盆蓮聯句韻

諸君賦聯句荷盆用石臺曾將斛水許能運化機來
悟幻看玄理夢香詣妙才莖何特地出葉故圓樣裁
泥擁霑無濕雨零轉更迴適宜君子愛從任凡卉哈

姿貴植宜少芳遲開莫催坐牢衣細濕看逼帽斜擡
清韻留亭句遺芳上社盃君詩可與適竊幸廻狂頽

賦得唐封郭子儀爲汾陽王

禁煙
應製

建德之歲河水清天子按圖開明堂寸地尺天皆入
貢山河鐵券垂煌煌整頓乾坤伊誰力豪傑肯數陳
與張曰汝元勳郭子儀中書廿考紆籌長八十揚鷹
呂尚父千里運籌張子房獅子一日行萬里渭橋飛
檄如電光回紇軍中呼萬歲大唐庭衢來八荒中興
大業仗汝才十載青冥我武揚望春樓前勞凱旋凌
烟閣裏留名芳皇家自有酬偉績奚用彝鼎與紀常

五等分茅錫之士小侯大王差可當內府朝閣輿地
圖一幅如畫汾之陽洪功永誓如帶礪至治已看垂
衣裳黃金斗印映白髮坐說皇恩歌再昌烟花不老
笙歌地風雨如夢干戈塲一時門戶生光輝八子七
婿皆朱章從此羣臣樂昇平仙李日月期無疆更有
榮名垂竹帛至今人說汾陽王

賦得三百六旬春不老

召試

王者體天行政仁中和至氣一家春虞皇盛化陰崖
遍堯帝洪功出日賓雨露四時長浹洽乾坤一氣却
氤氳金膏玉燭流羣品瑞日祥風被八垠咸若鳶魚

歸造化至今慈職入陶甄璿璣已協三陽泰壽域長
開萬物新蒼陸韶光迎玉輅禁城曉色繞中宸百千
萬歲如今日三十六宮摠令辰恭認聖人拊亨泰長
看淑氣轉洪勻南山北斗齊騰頌東國春光萬萬旬

芙蓉亭應製

戊辰五月十二日 上御映花堂命張畫幙
召臣等耦射右副承旨宋知濂注書趙庭和
及賤臣爲右耦同副承旨朴宗薰檢閱曹鳳
振李憲琦爲左耦檢校直閣沈象奎監射
上臨軒觀之命於階前立轅門發射樂以節

之拾箭吹以令之射六巡計所獲左右耦相
等焉命頒賞樂作諸臣行四拜禮 上顧謂
曰茲會豈易得哉芙蓉亭下有彩舟卿等其
盡懽而歸諸臣入映花門內是日風捲雨霽
雲日清暄苑樹濃翠池荷淨綠相顧而樂遂
登舟傍有二小舟樂工在焉少頃宣內廚珍
饌既飽又茶罷諸臣應旨賦詩製進命退
歸齊會銀臺考券旋下各頒書冊一部賤臣
領朱書百選臣等之所被恩榮奚但一時之
榮輝感激而已

荷舟泛泛露珠翻韶樂調成降法樽是日君臣同慶
意願將天保答洪恩

曬史五臺山之行到月精寺次朴府使

宗正 韻

羅世蒼茫閱海輪空花界裏淨根塵居僧倘契前三
語古殿猶安丈六身月帶明泉難辨夜木生深峽晚
爲春休言禪法無南北看取臺山像化人

上元寺

叢林禪宇肅埃氛合嶂縈迴路不分塔影先回東海
日爐烟直化上峰雲僧傳懶釋遺經字寺記乖崖舊
序文西去法輪何日返桂花開落祇香聞

登大關嶺口占

巉岵畏道使人危行路之難蓋可知若把吾心長坦
坦世間無處不平夷

觀音窟

海東多綽約朱明通澗渤上界足官府鸞鳳棲絳闕
虹橋斷消息陰火屢興沒觀音妙智力檀那深海越
衆生仰玄門色相殊恍惚玉版忽橫枝旃檀光彩發
翠鳥啣空花赤龍抱明月坎戶起叢林百丈空肆砥
雲衲磨鐵鱗蓮鉢補石髮摩尼燭金蘭濁水猶汨汨
風雷生警咳冰水幻嗟咄石頭何嘗滑金光殊不歇

爲闕傳燈錄可列法禪窟

清澗亭

竟日行行海上游爲看海色復登樓
高人着眼心無大大海還同一澗流

九龍淵

二華之頂餘氣積胚暉化核成一谷
百鍛萬杵至硬堅雪魄凌薄枯無肉
錯鏗斑稜矗牙帳下質靈壁俱隸
僕一夜毫光放千丈寶伽蓮葉行
平陸榆池龍子徙窟宅頑雲愁護
神鱗曝帝遣神丁發幻思閃斧宰
擘如切玉碧星夜漂銀灣決陽侯
執策驅霞轂玉女

拍手牽牛渚灑落輕珠三萬斛須臾日薄陰風集碧海
倒立旋坤輻毘盧衆衆與之合巨細支派渾一束
太山之綫穿成雷九地沉沉深黛畜是時世上驚晴
雷往往雲蓋停四麓好事冥搜諒判命巧逐盤蛟迭
挺鹿爭道銀虹渺端倪惟見淥沫搗輕玉百丈萬丈
那復測淒風沁骨寒生粟白晝雨雹多恠事企石延
瞰不可瀆我來放杖就石位遊日已驚生新肅安得
老杜與仙李萬牛筆力垂偉躅不然郭熙李伯時寬
程肯畫活一幅

海金剛

寶玉藏深山明珠媚大澤云古南侯子冥探抱奇癖
石廩引光采鱗穴好開闢零陽得高薦仇池發秘蹟
空洞迭天矯鎚鑿巧何劇鱗甲潤鐵花廉角淘雪魄
康干與文登叢駢涵鮫宅浮蜃薄蛾綠鮮絢幻晨夕
覽恣太乙葉興敗步兵履石潭知不遠欲補游仙籍

海山亭

回舟青草渚鳴策白雲扃山海相分處乾坤獨此亭
星岳鰲背出風遂鶴邊聽祇爲供遐眺安排只四楹

榆岵嶺上

茲嶺高復高高劇方見寺我行太荒唐登登殊未已

水何屢曲折石忽當前起鮮飈凜寒膩霞惹倩纈青紫
星芒捎帽角雲絮發鞞底蠹破籀畫勢虫蝕繪絲理
蟒尾復鱷腸波鱗逐旋蟻古望一元天新術延表裏
蒼狗何悅惚敗甃貯餘髓文殊儘有力盧春空自喜

榆岵寺

翠黛蒙籠晝欲昏曇雲飛盡見沙門深潭猶畜神龍
氣古鰲獨留飛鳥痕梵宇空傳圓貝葉佛家孤寄老
榆根高樓坐久清無寐檻外溪聲盡夜喧

隱仙臺

列仙好高居隱臺與天準朝曦薄脩樾層陰互淒緊

淨身廣長舌良晤結勝引陵緬復厲急敗屐艱彌窘
倒景隱半規警律叩虛牝藐盼凌瀛壖光恠發浮蜃
天霽浙迸璣霞屏競抽笋翰風盪霄雲豪氣湧不盡
倘有淮南子肅我塵外軫

摩訶衍

谿窮還竒境幽憇借禪房僧語松花落仙歸桂子香
雲山方窈窕時夏忽清涼石檻看經字依然道味長

歇惺樓

樓坐憑周矚羣峰摠可親層層皆面目箇箇各精神
太冗如遺物常清不受塵化工頗戲劇神巧詎容人

玉署直中和李友

止淵韻

梧垣西省地分高盡是明廷棟俊豪 寧考親臨傳
勝會 成宗盛際若躬遭石渠書籍通仙府瀛閣官
名重右曹久直非緣經術有 君恩感激敢言勞

夏日適過徐友

憲輔

居仍被雨邀北鄰尹戚兄

致赫 語闌遂及林泉卜居之樂朝起書此

意至乘涼出幽棲夏日情偶過逢二子相對若平生
清坐圍燈影高談縱雨聲晚途携手約何日出東城
聖上御極之九載夏旱孔酷八薦圭璧澤未洽遂
親禱雩壇靈雨霽露恭將蕪辭聊識鄙忱雖未

能揄揚萬一而備載其時事實兼附頌禱之辭
用前百四十九韻

聖后承天道休徵若雨暘時行宣四德節授拊三光
瑤曆欽分授金膏頌溢洋薰颺歌解阜化晷樂舒長
地解澤流浹臘深冷弭防郁紛被柯葉甘滋受葦篁
位育功叅妙寧清極御皇輿肖涵并育芸職圃咸昌
農本惟先務稼穡克備嘗洫溝盡禹力田畝卽文康
苑刈臨豐閣郊耕備籍倉勸綸朔之正形啓牧惟良
里置催耘鼓民遺盛種囊五稼登白臙九壤辨駢剛
相地瞻榆莢敦時望杏菖辛祈朝孔夙乙墾田既臧

播琴叱耕牯敏樹趨鳴鷓九扈候天駟衆魚遺地蝗
時徵占木旺歲紀逾金穰禾易終華實苗嘉不莠糧
長財垂廩宿權節布夷娘堯序功無失周禮理固當
汚邪滿車窶油與積倉箱玉搗炊圓粒珠翻簸薄糠
穡垂穢覆野穎合穰充廂作息寧艱食行居迺峙糧
陳陳比墉櫛栗粟密茨梁市售三錢直倉因九歲藏
壤歌偕老少衢飲遍村坊烝粒莫非極年康迄用常
云胡屬建巳遽爾致愆陽昭漢懼宣后煎沙驚聖湯
自春飛戴勝徂夏鳴蜩蟬澤闕三時喜期愆十日祥
燼燼蒸霧鬱焰焰火雲張朝曠霏因霽夕颺淒以颺

肥蠶張四翼走貉悍高睚南雀銜暉舞金烏挾景颺
壑爛徒盤蟒海沸曝潛鱗熯谷乾摧委茱陵旱蒺芳
疏煩捉搖箠淘喝蔭垂楊還灼陂池葑旋晞露圃蔞
絕彫熾陵谷悒憎燎帷床簟薄蒸成液葛織汗透漿
井心涸涓滴泉腹斷決滄浦渴移漁箭潮吞逗稅檣
焦焦怨土性杲杲亢陽綱畚種既皆損田穉又卒痒
綺眵封曷鹵羅眈拆堅强下濕枯多稌周廡曬早秧
功須浸斗堰計乏浚錢塘秦壟誰疏渭鄴塍思引漳
耘夫夢甌溢饑婦廢廚煬菜面黃欺鵠荷肩頰比魴
窶愁懸魯罄曠欲資吳艤携鍤遵溝立釋鋤繞畷徭

墳墟渾滌濯肩斗謾低昂衍沃傷毛剝膏腴悶種償
畿沿災孔酷海鹵作尤妨嶺右丁耗斲湖西判穢荒
魚喁徒瘠病狼顧競憂惶丁舞還無賴庚呼詎可量
九穰瑞已屢六旱理交相 聖念猶知惕民憂自不
遑轉溝愛若保置衽視如傷矯濟咨芻牧經綸責廟
廊疏宥宥諸罪察隱詢八方巫燒非誠禮雩求率舊
章初祈望嶽瀆再禱告城隍求助瞻先正清齋走庶
郎灌觥御琴瑟奠瘞薦琮璋玉食虬壺盱宵衣蠟燭
煌靈應何渺邈天意盖微茫夕渰降霏霖朝濟闕沛
滂民咨何爾辜心敬暫未忘應實祈神格省譽懋德

彭桑林事自責太乙禮躬將嚴戒啞樅坎戎儀簡駟
彭陪官護星駕衛士俶宵裝梁役除民力廛居布道
傍步輦承寶坐朱盖掇華障燧灌黃流爵墀將帛幣
筐工歌和磬筦侍佩響琳琅明德升馨黍精衷格炷
香聽卑臨赫赫孚速感蒼蒼昉饗治無間鼓桴理孔
詳月離犯宵畢斗轉抱昏亢少異梢條起族屯膚寸
揚廉纖微辨色颯灑耿成行瑞靄凝珠冕甘滋濕繡
裳歡聲陪肅仗賀語集清鏘已占泥牛濕同瞻石燕
頰濯枝籠暗柳打葉裊香棠圃卉滋兒蔽園蔬潤子
薑細流滑員蘇疎響滴叢篔屏翳驅車急焦明刷羽

忙紳泉融地軋線雷瀉天潢積氣凝靄霽曾陰發滌
泱鶴鳴登垤培豕白涉波汪尺寸均遐邇鋤犁報社
央古甃互霓暈疊巘綴霞粧公府歌胥吏通衢賀旅
商野翁欣共告田婦喜如狂龜兆黜哇陌龍鱗滑界
疆菱苗膏惠澤病穗甦沉育肩畚迸麤篋腰鎌迭利
鋌稻孫期稔稔禾弟樂莊莊繡澮飛窺鷺紋昀濕浴
鴛襖謳喧吠蛤農漏答鳴螢暖至相鄰里耦徂要友
卬田棹挽汲輓秧馬疾浮艍饜噴携懿管旨攘炊矮
鎗戴蒲忘胼胝扶杖集踉蹌馬掌稻苞穎驢皮黍早
房泉飛沙出白車覆雲占黃吉兆聽鳴雀豐徵夢牧

羊幪幪嘉秬秠厭厭盛粢梁終歲勤田畝乃秋滌圃
塲廛困曼壙牧庾廩壓匡墻村碓鳴泉杵衢醪溢瓦
觴已欲嘗水薺寧患療漚榔丹具凝如脂雕胡滑逾
糖績成機斷綜財阜錢朽縑科緩靜村犬輸輕鬧市
輦遺稽集鴈喙滯穗飽鷄腸蜡罷匏樽枵賽成玉鼓
鏗報農配后土祀稷頌嫫姜幽籥續新什楚茨閱古
緬泰堦民皞皞嘉代樂洋洋歲熟伊誰力功歸我
聖王恭惟文德盛長覩仁化翔勅命存深戒同寅勗
贊襄取人蕘必擇容諫木求謗樂育歌榛楛掄材薦
櫟樟緝熙勤講席禮讓苑儒庠戎政備陰雨皇綱肅

凜霜好生仍不犯懷德俾胥匡成憲監文武治規駕
漢唐八荒躋壽域左个闢明堂理驗鳶魚若治看鳥
獸躋皇猷煥黼黻文教鑄鏞簧化洽逾聞樂聲長彌
抱璜運休奠盤石基丕繫苞桑坤厚遂生養天行順
燠涼軒郊畜仁獸虞殿儀祥鳳瑞草抽莖秀甘泉咏
濯湘星歌迭相和河頌騰浩倡蹈舞同環海懽呼共
祝岡更將無逸訓拜手獻清間

游西江

漠漠江烟夜深迢迢渚月秋白相逢釣客漁翁且問
取魚取適

已巳秋以關西京試官路過松京吹笛橋

崧峰翠色入清霄客到斜陽短石橋吹笛仙郎騎鶴
去行人指點碧雲遙

練光亭次按使竹石徐太史榮輔韻

大同門外晚移舟舟泊城頭還渡頭對對亭分上下
起平平水自東西流判知天下難爲景直到江南少
此樓更有管絃喧四座主人留客聊復遊

玉署直中賦示朴待教綺壽約會崔國寶璜宅

涼月亞槐龍泫露塗荷蓋覽茲時物遷其如感懷奈
深院抱青綾故園憶書帶緬在崔氏居卜幽西苑外

淨壁潤圖書廣庭倒松檜風簟樹影深雨櫺溪響大
衙門曠周旋崇邱絕氛盞良辰竟何許願言要嘉會
感子贈英瑤吐章去粉繪當由姿稟高遂爲儕輩敢
亭亭林上月謾謾松間籟襟懷穆以清新肅起顛沛
大邦襲郇曹長河掩涓澮且辭檢詩律寧從尋酒旆
故與期河朔申謝多荷賴過往薄言遊無約亦奚害
聊令羞珍寶復可薦鮮膾爲我寄信息已賦停雲靄

簡曹學士脊庵鳳振

芳辰眷嘉侶矯思延昏曉往欵久未遂覽物情纏繞
邈邈溪雲暝亭亭林月皎敢有關心處春山亂啼鳥

童時淺知慮臨經厭索求聖狂差所念生困俱不由
時乘朝夜氣惕茲追愆尤晚嘆竟何益徂景惜如流
陪家大人作成都之行登巫峰命韻

弭櫂遵脩渚鳴策躡巖路江干一以眺澄光壘水樹
層阜抗疏綺飛烟曳輕素靈仙具鸞鶴來往紛朝暮
月珮鼓湘絃雲鬢響楚賦藉蘭企遐跡采杜興夏慕
佳期竟何許悠哉願言晤世務生纏牽真緣邨可做
慮淡物無競神愜境俱選寄言攝生客推此真詮悟

玲瓏閣

碧玲瓏裏人影明笑語遙應聞太清琪樹驚飛雙白

鶴玉欄西角下簾聲

仙樓夜咏

夕江淒氣轉清宵洞府沉沉迴碧霄樓觀向空飛不
定星河垂屋影全搖前生應誤黃庭字殘夢猶隨白
玉簫環珮無聲琴韻歇三峰曉色更迢迢

黃鶴樓

春風吹滿鸚鵡洲落日登臨黃鶴樓千古傷心片雲
在五更寒夢織月留漁村歷歷夜歸火芳草青青人
繫舟崔顥李白俱不見檻頭江水朝暮流

舟下六六洞每過一洞縣吏報其名輒寫一絕

晶晶碧玻璃皓壁清光聚薄灘在其側合置修月戶

右廣寒洞

靈根屹窮宙頽瀾不敢窘大人起景仰厲操爲世準

右砥柱洞

中嶺忽岩堯色相空裏浮一滴曹溪水散作千萬流

右靈鷲洞

癘癖似陸顛畫舫開茶厨洞神秘靈液乞置調水符

右玉女洞

尙覺衣領重携歸巫峽雲臨洲采若英續賦雲中君

右翠雲洞

巖巖峰相逼鱗鱗浪互迤回望曾歷處雲滅畫屏隔

右浮來洞

吹笙王子晉騎鶴歸何處惆悵不可接斜陽回棹去

右笙鶴洞

天孫濯雲錦掛壁燦星斗輕易不贈人爲待騎龍手

右掛練洞

阮郎步天台誰能繼斯遊我愛茲洞名扁舟少逗留

右留阮洞

黛畜深無底餘波尙吼怒疑有神物臥壁蘚半雲雨

右無底洞

林缺更圓沙人家或三兩髣髴木門道雙魚驚箭響

右浣紗洞

狡獪峰如戲漫漶流復工蕩槩欹側過如度月半弓

右斜界洞

桂棹洞簫歇千秋月相送猶飛一隻鶴堪續臨臯夢

右來蘇洞

洞穴紛張合交映半蒿碧一葉泛如鳧枉疑王喬舄

右金鳧洞

聞道清淺水亦復涵方壺衆仙散空花化作浪頭沓

右瑤臺洞

通靈列傳書誕詭言靡極達觀盖意寄愚者空迷惑

右集靈洞

清風歸木末鏡面澄光徹紛紅與駭綠故故微點綴

右玉鏡洞

佳處神每逞着眼闌闌外枉復生疑訝峰頭雲似盖

右華盖洞

澤臞遊福庭終教洞靈慳紫霞凝不散丹梯杳難攀

右赤城洞

晴暉轉沙尾滴靄冑颿腹便風忽吹送華陽第幾谷

右玉欄洞

我讀石鍾記遺響動疎吟舟行忽至此更欲註水經

右石鍾洞

瞬息雲峰失轉眄烟波來行舟隨屈曲真箇巴字回

右回巴洞

老僧將月歸寒寺入雲隱山空桂子落誰繼江湖韻

右靈隱洞

神人庶可遇此間真意濃願學元放齋復躡道真蹤

右尋真洞

石軀羅丈六曇雲護祇林彈指指法門山高復海深

右諸佛洞

巧斲千丈石騰翔更斗絕窾豁蘊靈異傍通仇池穴

右蠹蠹洞

恬鱗屢柳絮穹巖漲桃浪一絲張更好未必三千廣

右月磯洞

豁豁洞爲腹雕琢山如骨石髮明泉眼處處清流發

右千眼洞

蓬底灘聲急纜末山影轉毛髮忽淒緊駭雪紛片片

右噴雪洞

駛流奔巨輪瘦灘繞緩帶搖搖一葉舟復出青山外

右錦帶洞

曲曲遍勝絕奇景難名狀何時具書畫往來蒼雪上

右牧丹洞

猙獰怒石吼來現彤毛黃應添上雲譜鼓棹引仙倡

右雙獅洞

老龜化爲石一顧六眸明千歲爾何術呪辭學長生

右巢龜洞

烟波忽橫渡斜景照澄湖漠漠平沙鴈瀟湘一幅圖

右落鴈洞

歷歷三十六過去還惆悵誦傳紀行句聊供篙師唱

右解纜洞

爲待遊人至繫舟叢石根不鎖桃花水遮莫誤尋源

右藏舟洞

暮行

冉冉山暉薄輕輕錦纜過夢清逼鷗鷺詩壯恐蛟鼉
岸濶雲沙穩天垂星漢多叩舷犯風露候月聽江歌

觀漁

漁人意盡取張網截清流爾愛魚入網我愛魚出游
雪曉次東坡書壁韻

輕飈篩屑響廉纖透屋寒稜勢轉巖低唱堪誇金帳
酒高才羞道謝家鹽梅腮妬白窺深閣月魄猜明逗

短檐試捲珠簾看曉色紫華羣嶂玉尖尖

為趁正朝賀班入京數日聞嘉山土賊之變又
聞家大人以肅川兼官領軍赴安州急發到高

陽店口呼

聖朝民物殖妖孽敢心萌地勢三江水軍聲七佛城
大人惟職事兒子且私情不日西氛霽王師占出征
壬申十一月 元良受冊余以問禮官啣命赴
灣府是行也節使之赴燕奏請使之歸國先後
齊會亦一時之罕遇也聚散離合之際語多傷
懷亦嫌陳腐而萍水歡會終不可無迹以咏物

體為詩令漢叟

申

曰燭景博

李光

曰拈坡韻善

之拈以示之稚教

沈象

曰非癡眉姿池乎

古人遊夜未為非伴影閒眠竟坐癡燕寢香凝回綺
夢羈宵酒煖對芝眉寒光雪送疎梅影微暈雲籠淡
月姿偶看客星灣上聚金蓮曾是集鳳池

以太僕正懷刺謁提舉楓臯金太史

祖淳

于玉

壺之居公盛說壺居之勝仍命題初到玉壺諾
而未克酬也追錄為詩分押命題四字為韻

玉壺先生玉壺居我想玉壺居何如先生弱冠通仙
籍承寵長宿承明廬未老命賜三公服鍾鼎車駟光

門閭光祿池臺將軍閣畫戟森衛香凝裾人生富貴
須適意誰復孤高守往初我時懷刺門下造眼見山
風吹紗帽林木巖壑相映發白雲滿逕人不掃數間
茅屋太簡朴亭扁漫好飛來號紙帳烏几書縱橫一
樹梅發相爲好溪邨晝靜市聲遠終日罕逢輪鞅到
謂言幽居甚不俗我臥看山心常足年前買得張家
子山中四時皆堪錄山花對對發秀木山鳥款款啼
深綠清夜松壇抱月眠石泉琮琤鳴山曲天寒大雪
逾可喜俯瞰衆峰如攢玉板扉長掩倦招呼飲酒哦
詩聊獨娛有時客來亦無惡往往遊事多不虞愜情

便可菟裘老老去漸厭馳名途始識先生真清福玉
壺更羸華屋輸壺花壺月復壺雪拜請先生長在壺

次李供奉紫極宮感秋韻和楓臯先生求正

撼撼垣畔梧颼颼埤間竹白露曖長空秋光清可掬
禁省度良宵懷哉疇警獨楓翁發清想玉壺携月宿
適意恣所賞茲遊亮不卜勝躅縱難攀嘉藻猶可復
長懸玉峰月不隨雲翻覆公詩輒如期久與月相熟

疊前韻志懷

早歲弄柔翰竊擬垂青竹織綺未斷疋掇英不盈掬
所期違夙昔深省起幽獨歲月一何迅彌瞿無歸宿

羞爲曼倩隱，久厭君平卜。安分齊得失，探理觀往復。
韞珍積不沽，騁轍戒存覆。猶抱涓埃愿，夷險講已熟。
惠慶宮挽詞

珩珮夙承內訓篇，貞明懿範誕光前。摯闈音播京嬪，
日媯幄功敷舜攝年。盛德彌知夷險際，天心可見聖
神傳。六宮歌頌編爲什，閔享千秋奏瑟絃。
慈覆于今七十春，將辭靈駕淚沾巾。恭知兩聖聲
明化元自重闈，保護仁今想光徽如古史。欲言功德
有與人哀綸，內府金錢出終是昔年志事遵。

春殿春深瑞景長，兩朝隆養樂無疆。澣絳常繞萊衣
彩楣藻長承壁畫，光徽闡鴻名揚玉冊。慶符虹節進
瑤觴，獻儀一出宮門閉，草色空階曙月涼。
同岡石馬愜情儀，栢葉蕭森翠翼移。故老復除新邑
路，今人皆見正宗時。繁花翠輦經過處，淒露鸞輶
慟哭隨日暮。遲臺哀鐸動梧雲，恍惚降霓旗。

和朴荳溪

自我奉清光，祛惑亦泯吝。駢坐沕款酢，索居絡芳訊。
追驩雖不斷，進止勗自慎。薄姿紆主眷，南司授秩
峻。反顧增踧踖，潛棲阻課進。露萼豔低亞，泥燕憐斑
印。對此芳菲盛，離懷強成陣。君子宣惠音，郵牘如期

趨灑灑桃浪疊颯颯竹飈迅亮彼觸物緒增我思怒
饑感言結心曲佩之襲芳潤所愧璠與燕殊質詎同
磷

次卯君韻

京城二月物華紛忽對君詩似見君春草思添康樂
句黃樓喜進子由文竹床夜靜頻聽雨碧海天長漫
看雲來日山窓梅樹下相逢應復話相分

從弟幼之

始容

進士唱名之日奉一律識喜

建福門前榜字新幾家年少換衣巾君升太學先羣
弟俗重科名悅老親紅燄黃封傳盛渥蘭袍杏鞞擅

芳春讀書期望寧徒爾努力前程更有真

丙子春作順興府覲親之行宿廣州楸舍

踈踏齋心繞舊阡年華冉冉石欄前塔莎抽葉濡新
露桐栢交柯鬱晚烟仁德報施知有日兒孫成就儘
由天吾親手植雙岡樹將見垂陰百畝邊

到興州竹溪松樓皆茲州勝也

嶺路橫雲飛鳥從幽欄倚翠縱襟曾溪分百道皆呼
竹樓領羣芳獨記松遊鹿窺墻藤架動飛鼉過壁蘚
衣封官家百事看山足朝夕晴嵐几案濃

三樹亭拈韻亭先祖結城公所居

先民尙敬梓祖德夙銘槐覆屋圖書竝叅天雨露偕
當年培植固百代護持皆世世攀花樹情會瑟竽諧
浣潭書院夜宿賦示同宗院我先祖結城公直
學公文翼公享所旁祖修撰公應教公梅塢公
石門公從享焉

翼翼文翼祖邦國乃棟樑弘量河海深宏業日星光
謹言悟 至尊收涕扶羣陽稱禮配瑟絃攷德垂旂
常寔由世累仁靈泉發源長學徒興夔慕龔宇啓桑
鄉序位昭穆列蠲吉登豆將愀若陪杖屨升堂肅衣
裳屬屬顧遺訓敢期先徽揚勗哉我同姓式好底偕

臧戚戚勉具爾敦葦編舊章

慶州兄山江乘舟獵魚書贈李府尹

德鉉

紫亭眠起綠陰移又逐雙鳧碧水湄漁子收竿鱗迸
玉佳人捲袖膾飛絲烟消芷岸蘭汀迴風暝牙檣錦
纜遲浪跡南荒忘旅倦倚船連道此遊奇

宿東萊梵魚寺

夢發金魚曾名傳白馬仍前朝餘淨界此地住神僧
磬歇林生寂樓分月欲層山門連夜宿從覺萬緣澄
入東萊府夜雨拈韻與從弟幼之地主曹眷庵

季氏蕉齋

龍振

共賦

別來春夢海雲長分外佳期忽遠張千里相思真命
駕一時不省各離鄉綠陰如把西園酒銀燭依闌內
署香寂記天涯風雨夕兩家兄弟對眠床

沒雲臺呼韻共賦

金烏若木浴雲紅百尺高樓壓海東玉壘戰聲餘疊
浪星槎仙路劇長風身邊世窄浮何杳眼底天垂氣
可通會事碧流澄似鏡三山涵泳一泓中

留萊州七日居處鋪設飲食綺羅遊玩之勝俱
不可不錄効艷詞體作八絕以應蕉齋諄囑

墻角槐陰畫壁涼地衣簾額院相當彩毫題罷金牋

字一炷銅爐萬壽香

當窓恠石綠叉牙冬栢枝傍月桂花寂愛碧梧圓葉
色露宵偏向玉欄斜

印文綠遍案朱堆角後高衙早放廻分付六房休告
事使君深醉故人盃

葡萄文緞石榴綃新樣衣裳稱細腰傳語教坊催喚
入花兒如睡玉兒嬌

樓東北畔鶴巢臺彩綆烏輿度夕廻翠髻分迎花樹
下籠紗銀燭兩行開

倭漆盤床福字器勝歌妓菜雪糖糕當午別教呈節

果碧玻璃椀赤櫻桃

盤饌魚鮮百種嘉炒雲膩滑匙常加巡盃先覓方文
酒罷飯旋嘗繡匣茶

風軟弓柔抗鵠幙中紅誰是得多籌賭取金錢官府
出一時分與錦纏頭

密陽嶺南樓敬次林塘公韻

官渡停驂綠舫迎粉牆迴轉彩欄明芳洲極目迷烟
夢長路隨身歎月情古藪蒼蒼羅代見層波滾滾洛
江生名樓不藉傳圖畫先輩楣題盡有聲

袖拂紗塵翫寶題夢中烟樹翠禽啼郊頭草夾晴川

迥浦口雲籠彩棟低萬慮生澄浮寺磬流年入感度
村鷄湫蛟岸籜同幽抱深夜吟聲繞檻西

島潭

三峰對顧不相疎湖到峰前流更徐片棹繞峰旋轉
出峰峰送翠落輕裾

二樂樓

丹陽郡南水鏡湖丹陽郡北山蓬壺君向丹陽樓上
望一山一水摠堪圖

江行雜詠五絕

穹林霽景升北壁輕艖動四郡經遊眼新詩記大總

畜潭衛玠清駛湍孟賁勇我如醉賀監轉眸玄花重
月升鍾動浦霞歸燈照汀隔林望碧龕孤僧法華經
茲境經標列吳山便楚水願逢吳楚人詒語補缺史
軋軋旋洞腹畧畧轉沙尾縵綠犯衣襟層巒逼疊疊
船厨炊飯烟漠漠江上去化霞羃半嶺和嵐綴全嶼
食魚豈必魴荒江欲招隱伏泐劔槩稜吞舸鯨鯢吻
惡石有時磨惡魚有時遁君看江外地風浪無時損
輕風不是穩安流不是坦雲雨變咄嗟智家莫能筭
枉料瞿塘劈拙計君山剗鑑湖不起波涵月清無限
晶晶丹峽石厥狀皆可薦未着米顛眠石譜嗟欠典

江清減夜眠起月同沙鳥滋露橫臯端耿星掛林表
遠岸無行樹深峽不名草膩綠與蟠紅殿春能自好
潭瀨迅雷輪櫓窳忙石火回眸駭疊雪俄過訝是我
潭廻平砥面康莊驅緩馬我愛山過遲疾應管領寡
緩驅終稅鞅迅流易摧檣何處相較似臨流起悟想
可與佳籬落長懷好日井生涯畧相同門前一舴艋
常愛江南圖曲曲採蓮艇長湖未對花搜句愁清冷
永春至清風夾江山左右連綿無數峰盛名十之九
要識峰竒絕峰名玉與錦玉錦乃物珍古人費高品
插雲龍門嶂秀色手可攬盤礴屬之人斯言竊有感

魚鳥歸親近烟霞入校檢長浪四百里行色頗不儉
靜覺心如水五夜眠水檻紀行亂篋稿恣情脫律範

又雜咏五古二十七首紀江行

海上多仙人雲游驟紫鳳綠字空自惜青禽何處狂
蓬舟不可方有風還吹送一笑倚雲眠閒作赤城夢
巖峭類削壁壑穹肖分巷進帆窺竇口吞吐綺霞絳
線瀑穿成溜虛鍾日相撞捫蘿搜正冥篙師嗔我憊
輾輾上灘難滑滑下灘易上下不同勢灘水本非二
皆言下灘好騫騰快人意我謂凡百事悔吝快時至
我枕長江聲君衣衆山氣江聲波蕩涵山氣樹蒼蔚

聲氣此從生江山自知未入夜望碧空燦星絡以緯
官倉臨曲渚倉吏相聚語北巷男飼犢東隣婦彈絮
洞徵雖云寃稅期安可恕商船且勿放府中受帖署
浦落明沙圓茅屋依殘樹平疇麥苗黃短籬匏花素
大婦摘桑繭小婦漚麻布老翁立其傍筍筓治漁具
上田麥方刈下田秧始藝廚烟饁婦出正午林光霽
二兒前婦行一犍隨後逝老嫗背負孫出門望行際
羨渠家庄好江流板扉外灌或爲沼塘漏或爲溝澮
洞口連平陸畦塍錯如繪風吹見牛羊夏卉已萋蒼
畊桑勝仕宦童時此言恠半生困名韁未老情已懈

前修良有意，丌易談遜卦。生理說上游，便欲書籍買。
古人尙勲德，臯契邦之後。後世重功名，姚宋國之蓋。
無才苟懷祿，寧不愧金印。一盃泡花漲，擊汰風帆進。
欲持支遁錢，江上屋來問。江月與江風，取之不我靳。
且買一葦葉，來往於四郡。縱迷觀瀾術，庶續茗雪韻。
靄靄彩雲退，嶙嶙玉筍獻。疾羽高弦辭，雋翮雕筴遁。
烟霞與之從，晦明狀千萬。恠來峽行日，久忘飢渴困。
綠蓀被中泚，紫蘭生兩岸。鳴榔下夷猶，香風捲高幔。
擷之不盈筐，懷哉疇與伴。佳人隔雲浦，珠璫一何璨。
平湖盡意艷，清揚而美盼。鮮峰日夕佳，纈髮高鬟幻。

翠裙曳嘉樾，瑤珮行幽澗。佳期詎回畔，桂花恐歲晏。
賈客結大扁，逐利如蓬轉。風過楊子津，雨入巴陵縣。
淞鱗委玉尺，吳鹽飛雪片。筭緡誇金多，喚侶旗亭宴。
商人自有婦，坐惜紅顏少。白鴈無消息，烟波生遠眺。
折花忘插鬢，愁對樓月照。驚起宿鴛鴦，菱歌發新調。
放溜須放溜，烟棹復烟棹。洞雲放五老，渚霞藏二樂。
浦浦過依依，岸岸移稍稍。東舫掛蒲席，林吹晚來鬧。
衆巖三仙特，佳狀難具道。玉洞盤石布，八潭清流冒。
舍人發光彩，觀者爲驚倒。征橈忘失泊，來夜夢應到。
山近舷頭立，山遠蓬底臥。沙鳥翻雙雙，渚花垂箇箇。

時物皆可悅收錄如工課漸覺遊興健誰令策舊懦
篙師指梨村新茨是我舍舍南樹壘深舍北禾罷亞
村婦豈知客舟過應驚訝且有販鹽錢請君停舟乍
驪下多石灘舟搖波聲壯轟轟龍門嶽遠勢如推盪
隱隱聞犬吠楊根縣入望會事橫江吏載酒來相訪
江聲駛將暮遠岸林飈勁寒津不可渡朝雨波容盛
提席尋樹陰渚宿鳧鷖僅宵興步清光渚月蒼蒼映
蹄灘誰所宅清風可乘興委舟蒲柳港鳴笳涉樵逕
綠扉歡相迎深堂坐始定談言日欲夕清懷安可罄
樓上圖書輝樓下花木秀園圃摘瓜果田疇種禾荳

登山朝可樵臨泉夕宜漱真見鄉居樂一如詩語舊
詩語君記否分司共襴紵一夕秋風起賦歸何太甚
挽鹿情更牽憶鱸懷難禁每道屋頭樹手種今已蔭
夕月落高帆曉月放柔纜月溪與漢湖峭奔水更濫
峰壑迭送迎雲霓互濃淡所過多理觀我心虛以愴
八潭昔遊還丹邱在夢念如今不是夢相對心無厭
再宿有餘情回首雲灑灑何時更來尋歷歷前遊驗

二十四峯歌

丹陽之山千重萬重兮峩然特立二十四名峰綠玉
生筍兮靄雲動彩五老玄鶴迸秀金芙蓉兩山之間

兮環以日夜奔流之長江錦波浴鳧而雪浪噴鯨兮
大流喧飗小流淙層磴橫秀石絕壑倒枯松上飛磔
磔盤雲老鸛鷓下蟠蜿蜿吐霧神蛟龍瓊樹琪菓多
靈異丹霞翠壁無春冬烟消日出卷孤蓬捫藤遠上
心神懣退溪土亭忽已遠兮雲根綠字蒼苔封下視
塵土何茫茫因之萬想羅心胷神仙荒唐不可求釋
子空虛不可從有人綠睂朱顏朝明堂錦裳璀璨兮
玉珮琤琮忠言嘉謨日進於前兮山龍穆臨兮煥黼
黻而和笙鏞唐虞三代至治復挽回兮日月光華兮
景星璨而甘露霽又有人築屋於叢桂之阿白蘋之

沚兮玄龜蒼鹿來往月戶與雲窓妻種園葵兮兒敲
鍼古書盈籤酒盈缸又有人胷中礪礪卓犖蟠竒氣
寒風起雪花如席蔽天降錦鞬掣蒼鷹金鞭馳紫騮
兮虎吼兎落迷亂千山蹤悲歌擊長劔碎玉壺兮虹
翻月閃熒熒青燈缸我往從之何所好不喜高世而
獨立又不喜塵世之紛喧軒冕圭組兮不可以苟屈
鍾鼓饌玉兮不可以苟容列鼎固榮而飲水亦甘兮
我生何幸昌辰逢作歌高吟復長嘯兮二十四峰相
應如撞鍾

清心樓次地主呂內翰

東植韻

江舸經旬意故遲漢南名勝此行知洞霞細展桃源
畫灘雨高吟楚峽詞千里久遊樓更好片時相合夜
何竒燈前把酒生悵悵萬瀑人歸未共期

中國葉東卿

志說

宅子午泉詩應李尚書

肇源

索題蓋泉以子午兩時流出故名尚書赴燕時
有求東人詩文相贈之約云

靈泉之出亦竒哉每見涵星泛日回一息不差潮信
至二時誰遣水符來鋪光淨徹江心鏡洩脉潛隨地
底雷明月續題知待我願分瓊液注深盃

戲步權彝齋

敦仁

賭棊詩韻

仙閣招人白鶴詩提枰看道對支願金門待詔棋叅

一坐隱流星飛電時

唐官職志翰林員中有
棊待詔以饒棊手入選

宗侄

基一

之吳畫師珣六疊屏畫戲題

澗碧交拂崖紅漁歌互答樵唱世人空自迷路誰教
桃花不放

一幅郭熙平遠濃抹惠崇烟雨扁舟棹向何處帆外
青山無數

春水樹邊舟過夕陽橋上人行深處或遭真境常帶
詩意畫情

澹雲微月隱映遠山近樹叅差樹下定講丹訣已看

馴鹿種芝

常愛蒼涼曙天山光水氣渾合舟人欲發未發板扉
半開半闔

贈上使洪判書

義臣赴燕

大邦專對擢秋卿萬里皇華賦北征舊日行臺應慣
識公家太史尙留名梅花驛使空相憶杯酒陽關誰
復情記取灣江曾送別荻風吹雪角三聲

在寧邊府陪按使斗室沈公

象奎

宿留仙觀泛

舟沸流次東坡遊京山五古韻

綠江淨金塘暗流不知去幽灘清以瘦餘霏纈彩霧

深可泛舟洞淺亦褰裳渡麗峰繞其右藹藹異朝暮
樓簾照檣光未須勞杖屨怡盪彌情思時往旋忘步
下上殊佳賞樓舟相眄願更識居人好漁磯與樵路

六六洞拈東坡集七絕韻

蘭舟朝日乘碧流黃鶴樓前鸚鵡洲曲曲洞天三十
六一峰一壑舟少留

春水正當三月春穀紋交錯鏡華新遊人較識春江
好未必江干生長人

笙鶴金鳧各一羣玉欄屈曲石鍾聞依然叢芷芳蘭
渚裙珮雲中處處君

金陵江水會稽山半壑單汊不等閒巴字舟行來似
往終朝不省幾程還

百轉千迴未可裁前船飄忽後船來淡粧濃抹屏風
畫一疊摺過一疊開

林端曬網夕曛斜繡樣籬畦菜發花百姓生涯如許
好農家側畔卽漁家

隔峰微辨急湍聲五兩欹風轉眼生聞說柴鹽多少
船清南清北趁春耕

迴瀾奔峭恨怱怱頃刻烟雲一半空擬把經過仔細
記不知第幾洞天中

幽壁丹花繞纜飛晴沙白鳥拂筵啼每遭佳處停舟
久未到祥原日欲西

欲作三十六洞歌其如第次洞名何大都領識佳山
水逐洞尋名太事多

簡殷山使君朴梧墅

永元

簪筆承恩帶換銀萱闈奏檄彩衣新與君十載曾同
社爲吏天涯又比隣長日鶯啼懷友際南風麥熟上
官辰都門餞客知多少誰說梁州有故人

季秋爲支勅往宣川倚劔亭月夜逢斗室廵相
拈謝玄暉宣城五古韻共賦

王事懷靡及征輶日馳驚官道夾嘉樾華構隱森樹
幸值檐帷住攀光不辭屢旅思諒難紆賴茲滋歡趣
高秋媚霽景名亭愜奇遇東嶺升佳月蒼涼卷夕霧
一出紆郡紱衆務苦牽驚所治管名山霜月攢紅樹
前遊恨倥偬及秋留約屢須往誰復障想此先成趣
豈謂今宵月林畔來相遇離筵更酌酒塞路多風霧
以山蔬木杖獻思穎南相公 公轍 生朝效六一
集歌行體並呈

贈公以香山躑躅杖遺公以龍門熊掌蔬杖是鄉黨
父老之所扶蔬是山澤癯儒之所茹公今赫赫三公

貴絳冠赤舄瑤瓊裾曳履星辰近天座出門駟馬和
鑿車鍾鼓饌玉羅珍需紫峰之麋銀絲魚我有二物
太簡樸持此贈公無乃疎嘗聞老人恃杖行行步不
困心安徐六十於鄉八十朝刻玉飾鳩古制餘又聞
蔬菽產山阿土膏含畜風露噓柔軟香滑三十種食
不哽饁氣常舒仁人居貴服儉素至人養生吸清虛
願公茹此蔬扶此杖韶顏皓髮神仙如此意野真公
莫笑何必五湖之圖鶴飛之曲歟

黃橋李莊館侍郎

龍秀

按察黃海道時故人在

藥山黃堂贈六種黃物以寓薪祝進德修業之

意演成五古以供千里一笑

黃橋有名士令儀藹圭璋玉節按黃海葭屋遍春陽
茂績循黃龔氓謠及隣疆所憎黃鶯兒有房妓名西鶯于飛
比紫鳳黃昏摹繡帷歡樂何太荒良朋有規箴藥函
發黃堂所贈非瑤瓊物物何不黃黃金絡君纓進德
象精剛黃燭照君室觀心葆明光黃筆插君架掇英
璨成章黃精充君厨延齡學仙方黃蜜羞君盤潤肺
滋甘香黃茶注君瓶滌膩清塵腸願君到黃髮此意
儘勿忘

經山集卷一

經山集卷二目錄

詩

賦香山圖呈楓臯太史

次楓臯太史病枕寄作

昔謁楓臯公于玉壺誦傳驪州路中詩曰婆娑

城下江光好趨揖山前土脉肥早識吾鄉如

此樂被誰牽住不能歸余心識之未嘗忘近

聞來次鄉舍遂其夙願敬呈七言長篇

寄內

五月二十日夜苦熱不能眠使兒子拈韻代草

成三十韻寄內兼致所囑之意

蓬萊歌

與江陵李知府

鎮莘

夜筵共賦

家弟以卽鹿之行上雉嶽十日虛還示山行詩

一軸遂次軸末七古韻示之

閏五月小晦與從弟景執

允容

約做各體詩余

坐觀風閣景執坐採藥塢使傍人片紙書韻

字互唱酬命紅妓傳筒日出而始燭上而止

余得七古十首五古十六首七律十五律十

七絕二十四五絕二十九合九十九首句爲

八百三十景執比余減三首意其意不欲多

上余也兩軸工拙雖不同而其醉墨亂字豪

吟逸句往往天機呈露有可以想其卽席之

風流韻事遂惜其棄各粧而藏之

各體錄
第一篇

楓臯太史追寄贐章七言長篇五十六韻瑰字

傑句真仕宦之勝跡傳世之希寶也謹次其

韻郵呈

月夜坐池閣有懷沈斗室相公公時在伊川謫

所念到數十年來離合聚散之無常不能無

感于中潦草代書馳呈

七月七日愁雨悄坐適披見廬陵集有寄內詩
以斑斑林間鳩起興爲首句有日子能甘藜
藿我易解簪紱蓋歐陽公守鎮陽之日以携
手共歸之意問於內子也蓋出處進退之間
衣食不能無累故古人亦不得不謀諸婦歟
詩中盛言世路之可畏衆怒之可怵而未以
藜藿之能甘聊卜簪紱之可解此是公位未
高年未老之時而其憂畏保身之計發於情
性者如此今余才器遠不及古人而宦名日
益盛見此詩安得無感動于心哉仍次其韻

寄內子

奉和灣尹徐篠齋

淇修

驢贈及追寄韻馳呈

春川昭陽亭次板上韻

洪川夢梅閣夜宿地主韓侯

璵

上京留詩壁上

正月十七夜月色甚明登秋月臺憶諸弟

贈雲石趙直學

寅永

敬岡榮省之行

與雲石共登鳳凰山

己丑秋赴會甯官登鐵嶺

摩天嶺歌

夜燈閒坐偶吟示景執

十二憶詞

偶吟

寒夜枕上

家人每要示北方山川風俗衣服飲食之制長
夜無眠漫成百五十五韻寄之

偶題

夜燈適閱杜少陵夔州歌十絕漫吟步韻

我國興王之跡肇於北方故比之岐豐臣於是
行躬履目覩每過一山一水靡不詳審不啻
若按圖而考史也願先烈之宏達感王業之

艱難遂贊美詠歎記聞錄見衍爲岐豐歌謠
八十五韻寄示家人

滌愁軒夜坐

贈內

生朝寄示弟兒

六鎮紀蹟

田叟問答

燈夕觀劍舞

觀德堂望見村家打麥口吟十絕

滌愁軒戲押愁字吟一絕句仍思居是軒者四

時晝夜風雨雪月無非可愁演爲十絕

南漢玉泉亭次斗室公韻

以年貢上使出都宿高陽

庚子外王考孝簡公以冬至副使赴燕時伯胤翼憲公以義州府尹迎親駕孝簡公作一律識之翼憲公又次韻聯揭邊州人士尙今稱爲美事其後翼憲公又以副使經義州又次當日韻付揭今戊子內兄叅判又以副使和韻付揭三世副价亦仕宦家稀有之事也今余猥膺年貢上使之啣來留是州敬讀詩板

既切念舊之感又有繼蹟之幸謹次原韻刻付於下

夜宿溫井野幕屬副价金春山

弘根 求和

到柵門洪淵泉尙書

奭周 謝恩竣還殊鄉傾蓋

喜可知也用內閣聯句韻奉贈求和

瀋陽

姜女廟

山海關

康熙年間陽坡先祖奉使過永平逢魏伯子

祥

談話伯子有贈詩今過其地追感故事仍次

其韻

金鰲玉竦橋

圓明園燈戲

十七橋望西山

文丞相祠

岳武穆祠

盧溝橋望太行山

笙陔蔣翰林

立鏞

少卿丹林

祥墀

子也父子以

詩筆並名赴約有題

和海帆卓少卿

秉恬

蟳蜃螯詩韻

施生麟為其大人督鎮求詩

江沛東

淹和

宅會海帆共賦

樊昆吾

封

李秀才

宗漑

同住吉祥寺造訪贈詩

海帆與其弟筍山

秉愔

其子鶴溪

標

約會見筍

山作畫鶴溪作書仍賦詩代筆談

翁立本

樹棠

去年隨勅東來余以館伴相見於

雪樓今訪余於玉河臨別贈一詩志緣

延恩陳登之叩余姓號年庚官職走筆答之

登之連賦索和書示

登之臨別書懷示之又和

馮少渠

震東

滁州人文學盛名行誼甚高以孝

廉薦上京候選少渠思在滁時山中吟詩之

趣作畫一帖朝廷名士本州士人競題詩文

名曰空山吟趣圖因程主事

德麟

來訪余贈

其所作詩集續孝經一冊仍請題一詩於帖

中坐次率爾書贈

出玉河館次前韻

漁陽橋

通州

江南船

清節祠

宿紅花店朝登澄海樓是日生朝也副使勸酒

醉成一詩

三義廟

廣寧寧遠伯牌樓

遼東途中書故蹟示同行

經山集卷二

東萊鄭元容善之

詩

賦香山圖呈楓臯太史

我來爲官香山區對山又作香山圖香山千疊復萬
疊巧工妙手何能七分摹盤溪灌樾始有寺百尺飛
樓金碧塗綠圃琅玕玉菡萏毘盧上峰縹緲陵玄都
碧蘿翠蘚通幽逕羣遊麋鹿藏狙鼯又有鳴雷喧雪
之懸瀑曬以束練霏圓珠谷谷禪局架石广晨鍾暮
磬棲僧孤綺霞彩靄恍惚羅幢蓋來往浮邱洪崖徒

魏武檀君臺檀君窟循蜚異紀叅唐虞近代名釋開
祠宇七寶金蓮像跏趺我曾入山最高水最深處積
空灑氣生吸呼我欲燕室長對面呼僧灑墨試排舖
高麗太史龜頭字鍾王美蹟與之俱我今持此欲遠
寄云誰之思在玉壺玉壺老人愛山癖依巖結廬北
山隅手掬名泉養花木形容宛若山澤癯鍾鼓饌玉
雖非願聖恩不許賜鑑湖勞心役形被拘束日日珂
馬馳雲衢夢寐名山不可到誰能喚起移山思想公
得畫鞦韆然笑風檐展看動眉鬚依然引入福地洞天
裏烟霞襲帶神敷腴何必靈芝金丹粒然後志氣清

明沉疴蘇公不聞古之蘓子瞻秦少游病愈於輞川
峨嶠之圖乎

次楓臯太史病枕寄作

今秋恠沴輪行楓臯太史經危得甦寄書示
之曰續命後第二夜枕上偶成此詩蓋心界
虛明如赤子無一雜想而病前已屬前塵甦
後當數新緣故遂自號曰初學老人意欲刮
去舊習自勉新功以答天地再生之恩而非
讀書則不可故末句如此詩曰縷命甦回體
尙虛虫聲遙夜意何如深慚魯叟天時律空

恨唐人日月除形役分明生與盡憂虞瀕洞
死應餘從今擬作童蒙吉更授當年未了書
菊枕三宵夢不虛玉壺詩札喜何如安危係國神應
相禍福由人診自除常被劇憂心欲盡元推積善慶
留餘試煩壽世醫民手垂惠來人更著書

昔謁楓臯公于玉壺誦傳驪州路中詩曰婆娑
城下江光好趨揖山前土脉肥早識吾鄉如此
樂被誰牽住不能歸余心識之未嘗忘近聞來
次鄉舍遂其夙願敬呈七言長篇

婆娑城下江光好趨揖山前土脉肥玉壺丈人有詩

句一生思歸未得歸公今得歸樂何似迹公平生古
今稀於戲 正宗堯舜聖日月天地何蕩巍天爲聖
王生賢輔王室之光邦之禩星辰河嶽鍾靈淑詩禮
忠盡繩懿徽 先王一見托心契雲龍風虎承光輝
二十秉筆趨蘭省三十帶金而衣緋正笏朝端望風
采青麟美瑞丹鳳威謂公伊周可伯仲古社稷臣其
庶幾褒紀寵錫由特揀五日一朝聯禁闈世故紛紜
變俄頃公獨不渝而不磯一心秉義炳若日向來微
公人盡非岳海不動自功利不勝銘鼎與紀旂由公
謙挹不自有偉烈洪績多隱微公年漸高德益粹龐

睂皓髮哲而頤議論萬馬馳壁壘文章衆星羅衡璣
此樂可使朱顏駐豈戀紫陌盛芳菲玄巖有屋松楸
近拂衫一笑啓林扉閒來坐臥生清潤覆屋杉檜皆
十圍石氣長年亦公語何必金丹與羽衣向公心祝
頤期壽此意可但爲公祈

寄內

與君年十五結髮爲夫婦兩鬢今俱華適景諒已久
相安不相失情誼日以厚君拙我逾好我癡君不咎
倖我荷先蔭榮塗早趨走承寵香案前金帶綰紫綬
錦囊明月璫封誥君再受庫中輸俸祿不耕哺百口

子女長成行笑語紛左右佳婦與稚孫和氣盈戶牖
隆恩又藩寄東出盛行部無術報涓埃何惠及窮鄙
開衙閱堆簿兀兀窮卯酉計食相稱事昔訓心轉恠
郵便得君書書中何所有細成相思字辛勤寄果酒
且言契活累尺寸與升斗婚具當預備兒年十與九
一笑一蹙眉君言何太苟我性君熟諳豈可殊前後
財與災相隨此言當牢守滔滔顛沛者摠被名利誘
所受各有限如器殊甕甑清貧與我宜富貴安可狂
勸我勿營產君可爲嘉耦勉我恤窮民君可爲良友
君我俱眇薄於福敢多取君我皆孤露樂事更有否

君我多疾病安能期遐壽南郊築新庄岡松與巷柳
門通展省路樓對畊耘畝辭官棲淡泊素志恒恐負
我便繙圖書君可操井臼守分心常安勵操行無垢
糲飯與麤裙共混村婆叟無憂又無慮床琴娛白首
此真梁鴻妻千載名不朽

五月二十日夜苦熱不能眠使兒子拈韻代草
成三十韻寄內兼致所囑之意

與子偕老約旺里開新庄過歲仍逢春春日漸載陽
澹泊具盤桌精潔掃軒房我臥看書卷君坐縫衣裳
教兒開筆研課僕種梓桑汲泉煮茗飲日高眠匡床

不辱斯足矣豈羨芬華場君恩太隆重玉節授東疆
委毗承溫音不許辭異章感激誓圖報辭陞理行裝
到營纔踰月政術迷向方來宣愧周賢共理慙漢良
羈愁日多集舉頭思故鄉兩兒行相隨弟妹來在傍
病妻與穉子獨留在賢坊家室常團聚未曾久分張
年衰倍人情如何不牽腸縱有秋風約難堪夏日長
家事一付君豈待遠書詳古書數千卷秩秩盈架箱
手閱護先澤內賜襲恩光不啻滿籛金管念莫漫藏
且辟虫蠹損宜防風雨傷貯樓固扁鐫分籤整縹緗
紫薇與躑躅新種傍書堂箇箇石榴樹開花正鮮芳

雨蕉抽高葉月桂飄新香
督婢汲井水沾灌日爲常
二物俱所愛此意君庶量
後書須相報餘事畧何妨

蓬萊歌

我是玉京香案吏爲官來守蓬萊
州蓬萊池水清且碧羅列三島環
十洲朱甍翠棋雲中起霧杠虹橋波
外浮烟銷日出盪金光玉欄曉捲珠
簾鉤白鶴長鳴青鳥語碧桃花落錦
浪流金屏驚起朝天夢玉宇高唱水
調頭焚香讀罷黃庭經水更漣漣山
更幽瑤華采采何所思仙侶不來使
人愁蒼梧北海何處是莫教騖鸞駕
鶴遊我有金塘玉沼水沙棠之楫木
蘭舟

我有紅亭與綠榭繡檻紗窓雕玉樓
我有芳洲靈藥塢芷葉蘭花相疊稠
紫鳳羅襦石榴裙玉女携手雲英儔
高雲不動遠山低舞腰無力凝歌眸
仙音嘹唳耳暫明玉管笙簧錦箜篌
碧琉璃盃鬱金香一盃二盃花作籌
桐花細雨槐花月席上琴樽夜不收
朱顏白髮須臾變且可行樂春復秋
若使神仙真有之秦皇漢武豈虛求
香醪引滿發浩唱不願生封萬戶侯

與江陵李知府

鎮莘

夜筵共賦

嘉客臨瀛至池亭又一遊
琴高疎雨滴歌斷暮雲流
劒氣搖銀燭杯光動畫樓
夜深扶醉起相棹木蘭舟

家弟以卽鹿之行上雉嶽十日虛還示山行詩
一軸遂次軸末七古韻示之

卯君訪我關山外山行水宿來炎程聞道雉嶽多蒼
鹿曉起穿鞵影短纓鹿頭生茸如可餌鹿頂生血如
可傾人言食鹿可延壽使人氣湧血和平我聽此言
一歎息昔我仕宦遊西京藥山之北龍門西山門夜
夜鹿縱橫寺僧捫角又乘背鹿意見人須相輕獵客
聞之潛入寺是夜林靜鹿不鳴鷗鳥不下無乃似凡
物生成在安生昔食萍芩伏靈囿濯濯之毛啣啣聲
又生瓊圃吃瑤草遊行不顧眠不驚聖化寢衰仙風

遠末俗害物恣其情物亦遠害防人僞相隨枉性不
以誠仁人何必取於物長生我自養我精不妨汝行
不見鹿好是十日遊山行

閏五月小晦與從弟景執九容約做各體詩余

坐觀風閣景執坐採藥塢使傍人片紙書韻字
互唱酬命紅妓傳筒日出而始燭上而止余得
七古十首五古十六首七律十五律十七絕二
十四五絕二十九合九十九首句爲八百三十
景執比余減三首意其意不欲多上余也兩軛
工拙雖不同而其醉墨亂字豪吟逸句徃往天

機呈露有可以想其卽席之風流韻事遂惜其

棄各粧以藏之

各體錄
第一篇

我來官守經三月晝坐無事恒兀兀今日與君留詩
約凌晨起寢梳華髮細雨霏微林涼動西山爽氣一
拄笏送君騎舟泊藥塢飄然如入神仙窟看君意氣
清且豪萬丈文焰被池樾展紙落筆如雲烟滔滔詞
源傾溟渤使我悅若望大洋爽快已解文園渴

我才本空疎所學乏儲畜豈比金鎔爐竊愧玉蘊積
君恩重如山弱冠霑厚祿車馬榮我途錦繡章我服
未有涓埃報玉珂徒追逐行藏久自量何待君平卜

泠泠朝雨溢金塘綠霧烏雲蕩水光恠石連欄開隙
地細流通澗過低墻池華競秀依菡萏林藥無名殿
海棠夕卷珠簾樓上看玲瓏積翠滿匡床

微風將雨至隔澗聽疎松池澗月同漾樹深雲自溶
鄉思山共疊詩興水如濃看取田家樂雨中新麥春
樓下清池池上樓下樓泛泛池上舟池光樓影長同
漾不省經過何處洲

半世風塵夢留約在滄江欲歸歸未得何日對蓬牕
楓臯太史追寄驢章七言長篇五十六韻瑰字
傑句真仕宦之勝跡傳世之希寶也謹次其韻

郵呈

景星慶雲光日月肇自虞工之歌曰周雅商頌列國
風教人勸懲逾賞罰歷代變體漸瀰漫千派萬淙歸
滄渤不同文賦者之乎作者着工難倉猝河梁之五
栢梁七騷壇立幟嚴青鉞建安卓犖永明麗風操音
韻無一闕陳隋衆作等蟬噪三唐盛鳴指津筏浸浸
二十四名法詩教到此成始卒譬如皇圖日闊拓北
統窮髮南蠻粵耒耜鑄趙各垂制蚩蚩衆氓紛菑堡
百穀盈場雲子白沈宋操杵鮑謝晔李杜舉筆酌天
漿玉饌綺需百怪惚宋世蘓黃接光燄金薤琳琅詎

埋物蚍蜉撼樹古所笑羣愚妄論皆虞訥誰辨瑤珠
同荔枝錯把蟹螯比蜚蠊皇朝衆家競綺麗颯颯大
雅誰踰蹶我東羣才屬休明牧老以後芳不歇初音
淡遠中音盛正始旁流摠揚挖大家并世能及見不
以生晚爲嘆咄楓翁騎龍河嶽來廊廟之器公侯骨
天人王霸羅心胷壁月照室恒矻矻涯涘不見海汪
洋風霜閱盡石辟硯手抉雲漢報章爛錦囊瓊珮蒼
玉笏爾雅鏗鏘使人肅玉磬朱瑟郊廟謁奇麗明媚
使人艷繡箔羅幃曳裳襪奔騰勁健使人畏朔月寒
霜交戟駭曲折激湍餘波落孤亢疎木旁條伐千類

萬彙皆牢籠粲然以笑愕然艷蜿蜿龍駒追風電脫
馬不顧棧豆齧璨璨碧星羅秋旻光芒燭宇淨埃埽
皎皎芙蓉出清水不共羣卉較膏醇翩翩丹鳳餐琅
玕文翻不比鶴與鷓靈均乘桂列御風獨專其神離
濁汨我今仕宦出關東東指若木看日暍畊粟採藿
民生艱訟獄簿書常煩惰再拜乞公大手筆此行鋪
張不可沒金剛雲霞衆香城鏡湖明月羣仙窟若得
公詩讀此間百勝笙簫振林樾公詩不啻如寶玉字
字可使卞和別一笑倚闌思漸動展紙雲烟風雨渟
澹畫勁字揮毫成軼駕鍾王互勃窣韻硬句險逾馳

驟霞珮霓羣來飄忽補綴水經名山記貊國地誌叅
乘杙蘇州之句山谷筆收入箱篋光恠發歐九一生
愛澄心四壁寶氣燭房埃千金瑰貺意已飫又有一
請敢唐突披襟亭下春復秋去鞋來筇如相摔往往
貴達留高躅寺僧輿篋迎車軌今秋公能有意否振
衣一策掃粃糲玉洞泉瀑窮派族毘盧峰嶂溯宗闕
葱蒨桂樹掛長帶琮瑋玉澗晞華髮捫壁共讀天竺
書拭蘚細辨東林碣滾滾詞源三峽倒文虹萬丈山
顛揭酌以流霞肴蒼鹿行廚不辭爲公竭何似玉壺
玄巖間不有擾擾便兀兀公詩我言俱烟霞一詠一

酬氣勃勃

月夜坐池閣有懷沈斗室相公公時在伊川謫
所念到數十年來離合聚散之無常不能無感
于中潦草代書馳呈

昔我趨走起居注院中與公始相選公時貴顯藹時
望金帶瓊珮高馳騫我時蒙駭迷向方譬如孩童初
學步公視瓦礫如珍寶傾心繾綣紆眄顧猥登玉堂
啣西命問禮皇華灣關駐公乘使車出燕南領蓋相
歡如舊故橋果魚膾薑粉粥雪宵吟詩對燈炷贈以
印章與彩牋搯手期勉心曲布馬訾江寒唱驪歌一

番車轉回首屢不惜雲和和土缶管卉無用猶培護
憐才愛士公性然悅我還甚我所慕不才又忝龍圖
選曳履翱翔羣玉圃分司手校雲漢章芸窓相對朝
復暮北園東亭招邀盛詩樽歡樂不可數分符出守
鐵瓮城千里離鄉如邊戍有公按道時相見欣笑寬
我疎事務香山珠瀑共灑襟天畔峨眉雲霞吐迎勅
赴約林畔會塞天風雪兼雨霏畫角三鳴馬不發爲
我一宿詩更賦公入黃閣我窮郊中間歲月水東注
厚渥今春受隆寄虎符玉節關東赴關東省內有伊
川公何泣玦荒村寓與公相遇緣固厚世事榮悴安

可喻宦海風波無時起昔人亦嘆難行路洪原海月
悲歌歸早歷風霜心逾固盛衰往復觀物理萬事由
天公不懼伊泉甘冽可療病境僻神怡滋清悟感公
一生何可忘繹述始終篇中具官守絆身可奈何日
夜思公不可晤繞池行吟吟復望夜深蘭臯下白露
七月七夕愁雨悄坐適披見廬陵集有寄內詩
以斑斑林間鳩起興爲首句有日子能甘藜藿
我易解簪紱蓋歐陽公守鎮陽之日以携手共
歸之意問於內子也蓋出處進退之間衣食不
能無累故古人亦不得不謀諸婦歟詩中盛言

世路之可畏衆怒之可怵而未以藜藿之能甘
聊卜簪紱之可解此是公位未高年未老之時
而其憂畏保身之計發於性情者如此今余才
器遠不及古人而宦名日益盛見此詩安得無
感動于心哉仍次其韻寄內子

斑斑林間鳩歐老咏好匹錦翼花簇簇雄雌不相失
將子哺桑葚拂羽弄晴日鵲鵲相呼鳴有如呂和律
天性本至拙寡求循其實巧鵲構其巢維居以爲室
居安更何羨巧勞拙還佚衆鳥且莫笑物性諒非一
世人巧營生驅遣如鞭挾黠者釣名利宦海風浪颯

艱辛縱得涉一生亦汨沒榮華雖悅眼其奈衆媚嫉
田家有夫婦到老抱床瑟怡怡樂常裕歲月不倏忽
來往共親戚嫁娶長兒姪外事不相遷安分無盈溢
物固不忤我我亦寧害物熙熙乃全天心神常安逸
但見開口笑豈有書空咄四時各有樂百年歡未畢
而我早通籍聽漏常巾櫛霜靴與泥鞞未敢言病疾
世情難推測俄頃殊淵膝古人三不朽我敢一髣髴
宦業徒華美內省深煩鬱君子貴明哲全身是上吉
行藏當與偕向子懷每述七十那可期未老身欲乞
有妻良如子產業非吾卹縱有飢寒憂心恬無危慄

况子能幹理內助如良弼灌蔬又芟麻畜旨當祿秩
不願人鼎彝研架插花筆不羨人文繡牙籤標甲乙
鍾鳴行不休愧心甚殫効負乘必致寇聖訓嚴斧鑕
矯鴻若遠舉何患衆啾唧斑豹焉用文樸素貴其質
鵝村築茅茨滿原松杉密霜降又露濡掃灑慰愴怵
子意姑未知我計久已必子能甘藜藿我易解簪紱
此是歐老句如自我口出樂哉更奚疑携子歸蓬葦

奉和灣尹徐篠齋

淇修

驢贈及追寄韻馳呈

玉樹風前棲彩鸞朝朝青瑣染毫端窮途與世知音
少肆力爲文敵手難尙想清標臨鴨渚應將傑句壓

燕巒從知外試由恩造塞角邊笳且強歡

別後年華且半強東關西塞各奔忙春繁覓果懷林
逕雨屐提燈憶草堂淪落一涯同撫紱翱翔昔日共
含香西京卿秩由州績佇看徵書耀漠荒

春川昭陽亭次板上韻

百尺昭陽江上樓使君留客暫登遊沙汀宛轉泛晴
島林木扶疎生古洲
貊國茫茫何處問烟波渺渺使人愁
飛仙眺望更平遠一醉西風倚檻頭

洪川夢梅閣夜宿地主韓侯

璵

上京留詩壁上

陽江倦馬夕陽迴橋渚風烟宿夢梅雲裏行穿楓嶽

出雨中來對菊花開如君名士徒貧仕從古文人亦
吏才蠟燭齋宵成獨醉朋情繾綣見深杯

正月十七夜月色甚明登秋月臺憶諸弟

秋月臺高春月明滿城人語已春聲娟娟井落村容
麗歷歷川原夜景清曠野分旗酣戰合通橋垂袖緩
歌行對床羣弟眠甘否把酒遙思不耐情

贈雲石趙直學

寅永

敬岡榮省之行

俄從嶽雪谷雲歸奎壁仙官繡蓋飛栢露杉烟回遠
想銀袍金帶動新輝會心今世如君少經歲殊方見
客稀地主使家來共問輕衫不惜濕朝霏

與雲石共登鳳凰山

主人敬愛客彩樹開芳讌役車纔憇徒逢迎不知倦
敷葉覆圓塘物華彌盈眇纖唱佐低斟夾坐紅綠眩
欸醉敦宿好沕懷紆新眷預愁相送處深樹黃鸝轉
已丑秋赴會寧官登鐵嶺

驅馬登鐵嶺嶺路白雲悠鳥背秋無際林端野欲浮
人烟通極塞海色抱羣州把酒相呼顧豪歌賦遠遊

摩天嶺歌

前有嶺摩雲後有嶺摩天摩天嶺崔嵬萃律復巖巖
名以摩天不其然以手摩天天不可摩名實無乃相

乖焉蜀道難天蓋謂高何必名義相拘牽難乎高哉
九十九曲路透迤屈折西盤又東旋轂翻蹄蹶何足
道前挽後推十步八九顛以次序鴈而貫魚前者不
後後不前險磴百尺進竿頭滑坂金盤轉丸圓上如
太原涇陽雲梯甲下如瞿塘灩澦風灘船汗滴如漿
喘如牛振衣大笑始上巔古來羊腸鳥道雖未見咸
關鐵嶺康莊如席氈舉眼四望亦快哉氣色光景各
萬千俯臨汪洋盪瀾環北溟仰看浩浩蕩蕩薄太玄
右有脩榦灌樾蔓藤雜卉左有懸磴飛棧幽壑鳴泉
噓谷風霧虎豹嗥翻空濤浪蛟鯨涎白頭縱氣束爲

嶺迅躍奔騰勢相連天限南北如鍵鑰不與漢京通
人烟鞞鞞及女真關土在何年驅民戰鬪相奪食千
里荒服淪腥羶厥初開鑿者爲誰桓桓尹金相後先
重門擊柝邊警息杖鉞挾矢張威權伊來四百有餘
載里有耒耜無戈鋌 聖朝字民國遐邇十州選牧
恩德宣賦徭征稅最輕薄婦兮織縷男耕田又聞山
川靈異產珍寶一握之物直千錢細麻靈稗紫貂皮
蒼鹿茸銅銀採山珠採淵近來北氓何窮困無或使
民不得其利專若使吏良歲豐民熙熙摩天坦坦平
地人磨肩若使吏虐歲凶民戚戚其險百倍此嶺行

無緣我嘆摩天之險仍作歌以布來往此嶺之羣賢

夜燈閒坐偶吟示景執

油燈清熒夜何長客裏艱難百備嘗廚子乏烹緣浦
遠僦人拋釀報田荒不憂知是居貧術能忍聊爲却
病方叮囑傍人休說苦來時固料異吾鄉

十二憶詞

蓼莪一廢廓餘生原鵲相依慰兩情生朝對食誰同
飽遠念憐渠憶乃兄 憶弟

兒生豈識別離情別向衰年未可輕碧帳油燈風雪
夕臥聽村屋讀書聲 憶子

憐渠生拙未堪貧井曰縈心病苦頻遠地當寒那不
戀一生同是劬勞身

憶諸妹

夙約遲成挽鹿歸關山問路寄寒衣常羨鄉村好夫
婦白頭相對別離稀

憶妻

扶床學語幾多時長大如今抱兩兒地角天涯何處
是會渠猶悵隔隣離

憶女

迎婦長房與次房五年纔又半年強鷄鳴曙色張燈
夕應向中堂禮阿孃

憶子婦

乘龍喜氣幾年餘冰玉誰將較得如每緣遊宦虛拋
約何日山齋共讀書

憶婿

笑矣吾衰豈不然卯君笄女已三年聞道東床占解
額諸兄嘲賀更應憐

憶姪女

穉容幼態每依依眼記遊嬉五色衣繞膝挽鬚供喜
笑夢中常是覺旋非

憶外孫

汝慈慈汝極恩勤祈望賢名早出羣富貴須從勤苦
得牙籤日閱古人文

憶甥姪

驚北鴻南各一涯白山黃澗望中賒浮生會合知難
事兩地那堪共戀家

憶從弟

兩兄兩弟各分居共案同稠兩地如客裏戀家家戀
客往來思弟憶兄書

憶季從弟

偶吟

年華冉冉海山天一出林扉月幾圓積雪擁裘留宿
醉邊風撼棟減慵眠封丘鞭撻悲黎庶蘓邑流亡愧
俸錢祇爲君恩歸不得北來非是重官緣

寒夜枕上

對眼經看景物移真知氣候異京師雲間重嶺通車
馬城外長江界華夷地有仲秋常雪處天無五日不
風時怕看壁幔凝寒色擁被回燈早睡宜

家人每要示北方山川風俗衣服飲食之制長
夜無眠漫成百五十五韻寄之

我本疎且愚學術寡實踐任性或耿介小心還柔爽
弄翰習功令爲養希達顯弱冠忝黃甲鳴珮隨羣彥
載筆陪宮駕玉音垂恩眄榮轍遂馳騁初非藉汲薦
彤管鳳凰池蓮燭梧竹院侍射錫文豹對講沾珍饌
溫言及家室闔門頌庇瞻雲漢校天章奎壁膺華選
西闕頻宣召朝朝近珠冕慶會擢卿秩金貂何鮮炫
毛檄推孝理潘輿愜情怵天高而地厚寵光一身遍
涵海酌茂埃荷袞補乏線繼乾离明照攝帝舜化闡
邦基鞏秦磐區宇咸蹈抃初政承隆渥關東授方面
雷肆待賓儀藝苑掌詞撰菲薄何堪此謾被鄉里羨

言議謬職責臺省久涖泲屏跡三閱序對人顏自覲
匪怒皆由教有罪終遣譴拊躬歎孤負素志一何舛
解豸尋田廬松陰對書卷北關告水警道書馳郵傳
蕩析漂屋廬浸靈決澮猷携抱散之四泥塗困胝趼
蓬蒿被杼柚沙磧封鬻鬻夫婦啜其泣溝壑安得免
睿心增驚惕若恫思手援炳燭草綸言部屋如親見
撫恤藹陽德蠲停降需典髻白欣相告競起蘇病喘
銅章分邇班列郡趨吏掾六鎮最荒服歛荒况又荐
命汝其往視鰲山會寧一號佩印篆身疴非所恤王事敢
不勉蔡襄乞遠州張敞請劇縣范績播涇疆富頌留

青甸昔哲圖報效匪躬思蹇蹇請纓與投筆才器試

一展叱馭真爲忠乘障亦非賤行當壯心日勵操若

金鍊辭闕出東郭親黨勸飲餞虎韞龍文鞘意氣追

風電官道平如砥征車鳴幘幘西颺肅天宇層樾丹

黃眩金亭纈穀波玉屏斑錦蘼金水亭蒼玉屏在永平地釜淵漪

以碧晴景涵葱蒨三釜淵在鐵原地茫然弓裔國荒城飛野

鷲弓裔舊都真主仗旄鉞罪不赦荒洄郡名符臥治

想采肅楣扁卧治軒卽淮政堂額號金剛羅衆峰秀色可攬撚

香爐籠紫烟萬家互褰撓笙簫依遠響沆瀣若可嚙

晴旭登鐵嶺騁矚無礙胃美哉山河勢帝州大形便

元氣鍾白頭磅礴屢盤旋結成蜀道險散為秦野衍

風水上都冀田壤貞賦克達門蓄靈液達門池在三

江流渺渺天下居三大黃河大江鴨綠江為三大非比淄漳澗嶺

隘喉吭通臺隍頂背佃地靈所亭毒物貨固殷羨金

銀錫銅鉛蠟貝璧珉玳良材檣樺柎美飾鞅鞞鞞搗

牟滑藤楮織麻輕帛絹羽毛齒骨皮海捉兼陸剽衛

士健豨貅旗鼓明組練士或專經門深藏不售術所

遇皆恢奇悉難窮筆硯國島訛觀瓌王寺證夢現國

在安邊釋王寺亦在安邊太祖問夢於無學後建刹其地萬世黑石里葱龍瑞

暉現黑石里在永興太祖誕降舊基王迹肇基此按圖金尺剪原廟

遊衣冠朱瑟薦瑚璉宮松蟠蒼虬香澤依繖扇本宮

植松常掛石臺護馬跡金匱藏羽箭二嶺歌月捷太

破納哈出於咸關嶺車踰嶺螭首煥籀瑒六陵連珠丘彤雲擎

玉輦周瓜與沛風村謠雜里諺皇業繼神聖天休頌

穀戩華構敞樂民虹橋藻綵綯咸興有萬歲橋樂民樓畫舫棹

蘭橈長汀水清淺麗人曳珠翠象掃白玉瑱雕欄飛

羽觴錦絃歌聲囀青城望西島价夢叶渭佃青城北

島青海伯舊居神技列功宗雲臺儔匹鮮沙老青也西

垂遺像直節輝史匠北青有李蒼蒼肅慎都周遭依

山遼肅督氏故都在北青甫青社石罌異厥制陳庭集隼鵠耕叟

得爲玩往往觸鑄錢屹屹侍中臺長松列翠巘

臺在利原

高麗侍中尹璠征女真時所駐處 往代女真亂仗策長驅戰官軍三

十萬一呼龍旂舉桓桓金節齋恢拓更除剪

本朝金宗瑞號

節齋琴樽集夜矢雄畧可策悞微爾人盡非高名石不

轉可并定遠燕與齊叔子峴念我翼惠祖設施固厚

腆麻車讐威聲宏籌垂邈緬

余十二代祖東萊君嘗爲北兵使時野入尼麻

車欲爲入寇公知之招降者諭以朝廷將征麻車麻車聞之懼而遁 思齋訓警編鄉約

導民善

思齋金正國號按本道時作鄉約訓民歌教之

近時稱南閔儒教齊

一變

藥泉南九萬老峰閔鼎重按本道時興學勸武多有設施

雲天峙兩嶺禹斧

勞鑿穿

摩雲嶺摩天嶺在端川吉州之間

步步縈巖齧躋攀欲暈顛

吉州至明川朔氣襲衣弁長白特雄渾坤軸勢蜿蟺

長白山在吉鏡間 七寶映晴雲翠髻環靚髮

七寶山在明川地 鏡城

開帥府重關壯鑰鍵

兵營在鏡城府

茂嶺臨寧州

茂山嶺在富寧會寧

之 北風吹帶縹譙堞駕鰲出豆江飛沫濺

豆蒲江在會寧府東

十憶昔龍蛇歲鄰壤構兵燹偉哉鄭評事義聲一路

擅烈烈八義士奮起熊魚辨

壬辰之變北評事鄭文孚爲大將與會寧八義

士倡義立功并享顯忠祠 忍言遼野役胡騎恣蹂躪康生歸淨土

傑氣增敖蹇

皇朝人康世爵逃亂自遼東來居會寧地今屬茂山

淒涼五國城

往事誰能辯

五國城在甫乙下鎮

翠華蒙腥塵消息隔京汴謀

臣摠噤默武夫徒拘攣千載胡公疏志士淚欲泫勝

區與往蹟宇宙一仰俛悲歌增慨慷豪吟疏滯狷政
堂名聽琴倘學宓宰單聽琴堂會甯政堂額號荒城徵索急疲
氓胥睚眦趁歲開清市犢健換驄駟會爭錐利蠹
俗挾詐誦威愛兩難行仙泄愧啜餽糴簿多久逋未
易完廩靡烽燧謹候偵干櫓思修繕胡山當面立長
嘯撫華韜先春舊疆場一舉邦席捲素乏金城畧自
顧笑迂悞積瘼紊如絲何術整件件題牒每頽然吟
疴憐衰倦土風難該述知鼎由嘗臠列居無市肆廐
竈同柵圈交易非孔方輸載以收棧園植無梯栗機
織昧絲繭果品拾橡榛衣制縫氈毳烹飪失油漿何

以充廚膳田種非秔稻粳麥作餅麵歌管不成腔豈
能佐賓讌夜黑常飛雪朝陰每集霰獰風掣棟壁搖
旋劇暝眩兀兀雖少歡何用常憂煎家人念旅苦細
書來片片而我厚恩造茂效恒駢悞遐陬民事棘柔
摩荷特揀早夜懷靡及殫竭敢自宴玉階通萬里聖
化囿肖螻期宣九重德衽席俱安奠好待春風到布
澤陽和煽寄語莫勞念羈愁好自遣祇是五更角曉
枕獨轉輾北斗何闌干那堪玉宇戀

偶題

邊山日色屢陰晴歲暮那堪遠客情官比家貧艱更

甚身將民病痼還輕羈愁似草除仍蔓亂牒如塵掃
却生日對瘦氓徵索急髮邊添白不須驚

夜燈適閱杜少陵夔州歌十絕漫吟步韻

茂山嶺北古豐山峽眼初延廣野間一望平蕪三十
里依山城郭呀重關

女真古國共連城鎮堡猶存部落名夕風晨月簫笳
響引作龍城玉塞情

官居常得野人食炊粟陳蔬飽每朝三月長齋忘肉
味伊來非是聞簫韶

漠漠雲陰低遠天急風吹度白山顛夜深何處京華

望樓畔闌干北斗懸

城中千戶瓦爲家籬柵相連覆雪花農家氣候憑相
問四月初旬麥始芽

野田上下播麻子山畝縱橫長黍苗男穫婦漚四隣
出牛車軋軋鳴朝朝

穿雪剖冰汲路通皮衣繩笠抗長風行無錢幣居無
市看汝如從太古中

四方賓旅來相集臘月望間清市時商人重利輕欺
謾恐教淳風漸薄漓

後金先尹詎能忘開拓功勳萬古長近時南閔多經

理美政留傳姓字香

一曲豪歌打玉壺漢時飛將近何無誰能一度長江水竝勒燕然片石隅

我國興王之跡肇於北方故比之岐豐臣於是行躬履目覲每過一山一水靡不詳審不啻若按圖而考史也頌先烈之宏達感王業之艱難遂贊美詠嘆記聞錄見行爲岐豐歌謠八十五韻寄示家人

於戲蒼姬世三十年八百粵自幽岐基王跡金刀奕葉東西京厥初礪山與豐澤蓋帝王積累而荆垂地

爲效靈天與宅不有禎祥現神異曷用傑驚畏且服

於戲我家岐與豐其惟朔方之道鐵嶺北恭惟 璿

源系完山 司空種德傳十六司空任新羅傳世肇

自 穆祖 翼祖義問宣至于 度王 桓王前列

篤於戲 穆祖避仇離甄城今全百七十家從悉直

古國名後徙湧珠德源又龍堂在慶源府鑿石開道

東門確騎射神藝彰德威初拜江南千戶職穆祖居

以爲江南五峰顛種松蟠枝柯 聖孫寶弓籠青玉

東門峰有手植松山川鍾靈古幹東金塘八水環黑

角明珠媚澤光氣騰蓮藕開花紅灼爍胡今疆場蹙

舊步故 陵草樹迷荒漠 幹東在慶興府東北三十里豆蒲江外有入池第三

池金塘村即 穆祖舊基後有黑甬峰 德 於戲

翼祖襲職繼仁聞時結諸部從飲博黠酋外敬內實

忌陰機奚關藏戈戟老嫗奉盃前致辭公無居此彼

難測爰及 孫妃朝走馬回望賊氛彌平陸海岸無

船那可渡水退如潮淺可尺踏流畢濟水復至蛟濤

鯨浪連天碧沱冰堅解始信書神所隲佑不容力赤

石穹窿如伏龜荆荒剔蕪營穴復紫芝生芽甘泉湧

歸者如市居者樂至今草木鬱含光薪斧欲向雷轉

谷 女真諸千戶忌 翼祖威德欲害之 翼祖至奚 關遇老嫗告其故 翼祖馳還避于赤島無舟可

濟水忽自退遂入于島從者畢渡而水復大至退者 不得渡遂陶穴而居島在慶興有甘泉赤芝石如伏

龜草木鬱茂 樵者不敢入 洛伽寺窟親祈嗣渚虹祥夢現神釋 翼祖

祈嗣於襄陽洛山寺觀音窟夢一衲 來告曰生貴子也未幾 度王生 於戲 度王來

胥望德宇 望德峰今慶 興客舍基 異蹟維何池曰赤夢有神翁

拜且訴乞公一箭殪我敵朝登南麓望雷電玉鱗蜿

蜒相掣攬陣雲不辨夢中神臂弓不敢輕送鏃是夜

神告更丁寧白者是主黑者客彎弓盈月箭掣星鱗

族辟易雲冥黑烏甲閃閃奮鬣退屈伸浦開生霹靂

斬蛇射蛟同英武壯畧出常驚愚俗靈恠矣哉神來

謝報以慶福如幾式 度王夢白衣人來告曰我居雨 池有客將奪我居願公救我

度祖持弓矢往池畔有白黑二龍相鬪不辨主客而
還復夢曰白為我也度祖往射黑龍中其腰黑龍
帶矢決岸而走屈折入豆蒲江土人謂其池曰赤池
浦曰屈伸浦白龍復來謝曰我當報公後世必有大

慶於戲桓王度心貆其音一國倚重仗籌策卓趙

跋扈和州亂龍津人趙暉定州人卓青以雙城難治

誰可屬一舉指揮囂氛定哈蘭今咸興北社地洪肯今洪地如

捲席神衲望氣卜泰運誕聖之日獻米藿僧無學居住於薪寺

望氣來告桓祖曰將生貴子及祖之誕生來獻米藿曰王者必生云太彩電繞斗霽

雲紅歲在乙亥里黑石在永興於戲神聖文武我太

祖生有異質克岐嶷如天如地如日月太平萬歲青

邱國幼嬉聚石為城形羣兒熙皞唱歌曲三歲時每聚石為城

曰都城坐石上使羣兒聚呼曰熙熙如也皞皞如也宗臣早獲霸王輔价江夢

味渭水卜价江慶興地名以价江亭長禦元人蒙哥毒於匡城將行懿妃崔氏夢有人來告

曰今行必獲興王之輔果遇一男子射鹿於价江山即佟豆蘭射藝出神天下無幘

頭中毬哨鳴鏑常作木毬大如梨令人於五七步外仰擲之以幘頭射之輒中又好射大

鏑鳴一發二獐洞有餘矢聲尚振照浦木照浦洪原山名嘗獵

山中一發洞貫雪峰草屋夜讀書繞以雲漢綴奎壁

雪峯咸興歸州山名慶典宅中鞏丕基篤生二聖綿

寶籙翼祖自慶興移歸州洞人謂之慶興宅連浦壇

高祭星歸都連浦在於本宮西二游鱗玄豹來騰躍

八駿中游鱗玄豹皆產於此地盤龍峰呀開馳道虬蜿鳳踰搶金勒

威興盤龍山碧嶂臨海平如掌圓毬向室閃挑擲擊

有馳馬臺亭在威興府南三十里太鷄鳴砧動負三椽土窟頭佗妙解得

嘗夢負三椽萬家鷄鳴千家砧動有老婆曰雪峯土窟中有異僧人目為黑頭佗太祖往問之僧曰負

三椽王字也鷄鳴高貴位也砧聲御近堂此地建刹也後建寺名曰釋王在安邊僧無學也

證吉夢金像貝函自廣積佛像及法器自吉州廣積寺載置釋王寺云納

哈萬騎渡江來參散今北諸郡恣踏蹴弦鳴馬蹶賊

喪膽連聲乞訴無相迫假面驍將空引轡紅旄悍酋

虛注槊毳幕夜遁不敢近北鄙一夕重恢拓驕蕃獻

馬嘆天才威關車踰塵清廓元丞相納哈出寇北鄙太祖射其馬連斃之納

哈出悉呼曰何相迫也有一將被甲飾以朱旌善槊太祖射燧之又一將者假面太祖射其馬馬驚而

躍賊引轡口開射其喉納哈出遁去遺鞞鼓良馬曰李將軍用兵如神真天才也威關車踰二嶺名今年

立太祖勝戰賊介乘虛引女真咸和潰陷肆剽掠

壯士日夜望神威旌旗一麾如振落北人金三善三

行誘女真陷咸州和州壯士望隣寇蔽海萬

之至太祖引軍至鐵關介奔女真隣寇蔽海萬

舳來大門嶺洪原下傳金柝松枝七穿碑礫震狡酋

駭散夜空壁賊乘船寇北太祖至咸州營中有松

發皆中一軍踏舞賊聞螺聲大驚曰此李萬戶碑礫螺也皆逃走碑礫蛤屬太祖常使軍中吹之也

萬民懷德簞壺迎王師所向無不克豆漫猛安野人

部落酋爭來附弓劍八衛悉臣僕盡化被髮襲冠帶

寸塊尺壤歸版籍金尺復定三韓境定鼎漢陽如宅

洛順安

永興社名 咸興社名

宮殿高繡簾綺疏捧紅旭衣

冠月遊儼丹宸玉瓚朱瑟薦嘗禴羽箭十三驛弓一
舜琴堯冠寶光燭社枌廟杉人猶愛雙松况復親栽
植島夷欲犯驚轟雷正直亦爲神所惜鬱鬱六陵
連珠岡龍翔鳳舞氣靈淑小臣爲吏踰鐵嶺披霧覩
天頌無極黃帝仙仗崆峒巔伯禹神斧龍門麓野老
往往說其處四百年事如晨隔岐鼓嶧碑行相望鞠
躬稽首齋敬肅生民清廟頌舊什大風七德按新拍
邇來太平不識兵男晝耕兮女夜織風不鳴條海不
波新豐鷄犬散阡陌人謂北方鍾元氣峻天白頭祖

衆嶽形勝自作帝王州棋布星羅控嶺隘清河運回
聖人出大地理應王者作我謂在人不在地此山此
水自開闢天作高山慳且秘何以主之求其德有若
幽岐於周豐於漢我王世德受天祿於戲 聖子神
孫繼繼而承承磐泰洪基千萬億

滌愁軒夜坐

雪山歲色共崢嶸玉帳無眠坐數更凍處烽烟凝列
幕曉來星斗掛層城海雲噓動魚龍氣山霧衝開虎
豹聲萬斛閒愁消不得倚風長嘯倒銀觥

贈內

知君三十四年餘同室同心契不疎人世交情朝夕
異惟君到老一如初

青春結綵妙齡齊閱盡悲歡夢却迷已見兒孫紛列
眼居然白首老夫妻

君生性拙我才疎百事于人摠不如貧固是常閒是
分莫將不足較人餘

桓氏布裳翟氏薪齊眉奉案待如賓庶將貧素期偕
老可待香山詩語申

感君憐我常多病每勸休官未老時剛愧浮名纏不
去天涯淪落遠相思

兩地一心思正苦更從思苦見真情不是先生情獨
勝糟糠舊義詎相輕

北郭先生辭楚相駟車不易室中言願將紙局兼紅
飯長伴維摩不出門

楚騁北郭先生為相其妻曰駟車不過容膝重肉不過一味何必殉楚國憂乎先生遂辭焉

燕處如齋屏華艷宋朝王馬與同清問卿堪作夫人
否本是山公義不輕

宋王荆公司馬溫公性不喜華艷其夫人遣姬妾冀一顧輒曰

何物也亟遣之晉山濤貧甚常謂其妻曰後我當作三公卿堪作夫人否其後貴顯思其言不置媵妾
鄉鄰呼我為詩人計濶營生一任貧百口付君家室
累官居專意恤斯民

我教羣兒君教婦君操針線我詩書我獨遺安惟此
道何須駟馬耀門閭

生朝寄示弟兒

曉眠慵起旭初敷兀兀無言坐若愚四十年來今日
每二千里外此身孤餘生不復童時樂往歲猶將汝
輩俱朔氣邊聲添百感何心官閣獨傾壺

六鎮紀績

白山鎮北極坤軸轉塊北滄溟環一泓重領勢橫截
肅慎始啓宇女真繼勿吉本道女真之地女真之先
出于勿吉居古肅慎之地
浸盛元魏代標號部有七元魏有七部曰粟末曰伯
咄曰安車骨曰佛涅曰號

室曰黑水強弱互吞併隋唐稱靺鞨二部附高麗黑

水與粟末唐師壓東境渡遼改震達李勣之破高麗
粟末部去保東

牟是為渤海國太仲象與其徒南北殊生熟金緒肇

阿骨在兩者繫籍于遼號熟女真在北者號服元國

不張餘蕃自猖獗倔強抗勝國食疆耽寇竊肅宗及

睿宗命將思征伐曰瓘曰延寵佗佗邦之傑官軍十

七萬長春地名仗旄鉞所向如拉朽一舉蕩巢穴畫界

築墉垣公嶽龜頭屹高麗肅宗睿宗時以尹瓘為大
元帥吳延寵為副元帥率軍十

七萬屯于長春驛分遣壯士擊女真九處開州府徙

民邊疆實浸浸百年間籌策屢得失聖朝握金尺區

宇始寧謐佟伯布威命招安刃不血酋長皆入朝冠
帶化被髮編戶歸版籍嚮義敢有越置郡至世宗

沿革間非一偉哉金節度獻疏謀密勿開營日恢拓

鎮堡星羅列夜樽獨整暇姦謀自沮遏世宗時承旨金宗瑞拜節

度使上疏論北鎮便否於是畫定疆界列置鎮堡金公為政嚴厲吏士苦之一日夜宴矢中酒樽色不動

曰奸人試我耳何能為耕商薄稅賦戰戍嚴紀律移民壯邊圉

氏族多顯閭鄉里遂美俗休養蕃民物麻車與尼湯

并蕃胡部落名如木有皂葉懼伏不敢肆重關固鍵鑄懷綏

由聖化經理亦良弼極塞無釁警昇平今日迄鏡城

據要衝帥府於此設雉堞冠一路堅固如鎔鐵茂嶺

更控隘六鎮列屏闈岡嶂支共連川江派各別土俗

幽并等官制魯衛埒茂山雖新剏境壤最廣濶奠居

歲餘百邃谷剪蕪第紀石勒山頂分水兩界割不恪

克登議邊籌失嗟咄袖手蹙場步春碑惜剝沒肅宗時烏

喇揔管穆克登來白頭山定界我國遣接伴使什權

遇克登於三水府克登但與譯官上山坐汭水間曰

此可名分水嶺遂勒石為諸州拾舊蹟野乘多漏闕

記先春嶺古有定界碑云黃帝堯舜處野老尚能說鬱葱孔匡里肇跡我沮漆

慶興古孔州慶源古匡州龍堂陶穴復植松絲瓜隄穆祖始居慶源之龍堂東

門峯有手植松幹東環八池金塘荷花發穆祖又居幹東之

龜石鎮赤島海濤擊蕩瀟瀟神慳始與宅芝秀泉甘冽

赤池掬異夢神鱗所宅窟箭發雷車轉石抉浦屈折

靈竒人不測定由神冥騰永頌殷周業寧擬漢唐烈

阜壠跨瑟海羅堡倚烏碣几案蛟鯨遊窓櫳日月出

蒼茫句麗墟寶塔劫塵閱柱護鍾簾懸銅秘印篆纈

慶源北有塔古高句麗限城界府北有石柱
舊懸大鍾云又有人掘地得匡州防禦使印古弭騰

獵騎羣獸彼葭茁古弭島有獵場立巖矗霄漢雲氣常凝結

海島大小草牧駒產駿逸穩城有立巖其上常有雲
氣大草小草兩島即牧場

甌峰蟠三界眺矚極恢豁甌峯長白山餘麓也盤據
慶源穩城鍾城之交而六

鎮山川江外嶺
海皆列眼前山鍾與巖斛形名取彷彿童巾池甃

荒吳憶洞草密明麗涪溪村耕鑿屋比櫛鍾城有鍾
山斛巖童

巾山城有四池鋪甃童氏所居涪
溪有吳憶洞吳憶以樵客修仙術移輶伯顏所候水

春始撤行營在鍾城
古伯顏憇所完顏築雲頭恃險肆驚傑千載

灑恨涕隆宋債皇轍壁嵌樞密字血痕不磨滅野人

夜拾寶遺塚事怳惚對矚汗生臺層巒特秀拔會寧
有五

國城一名雲頭宋二帝曾住於此云城後壁嵌有張
樞密使四字即血書而至今不泐云高嶺東有皇帝

塚及侍臣塚云高
烟臺越邊隔江長白布嶺隘一郡或七八行城今

雖圯皇甫功誰軼植木以為樊豆江流瀨汨豆江邊
古有行

城即皇甫仁所築
今廢只有植木南閔稱良伯導俗敷政術青衿游

學藝衛士習馳突大畧紀所聞餘瑣難該悉

田叟問答

春晝拂春愁出步清溪淡江邊逢田叟問叟居何里
叟年六十餘所業者何事不覩王居壯寧識榮祿位
未嘗羨芻味寧識綺紈美勤苦何所樂叟老固虛耳
我年未五十顯達燦金紫鳴騶揚意氣擁節耀瞻視
鄉鄰以爲榮比叟更何似叟俛嘻嘻笑愚哉官太愚
人生各有樂所樂固萬殊孰處才不才亦各鶴與鳧
不以我所樂易彼之所趨我屋築茅茨容膝亦易安
我聞華屋居鬼瞰多愁嘆我食具蔬糲淡泊胃氣清
我聞吃肥膩腐腸以戕生我服絰與葛寒暑不逼肌
我聞鏤珠玉物巧裁亦隨我有老醜婦對坐長怡怡
我聞金屋貯芳華能幾時我女朝漚麻我男夕飼牛
我老無役心每事皆自由或醉漱清泉或歌陟林邱
行無罪辜懼居無別離愁如此以送年何樂更加不
問官形貌瘦胡爲此江邊我聞建官百才各相稱焉
稱者受福利否者生吝悔各隨官大小章章功與罪
釜鬯各異制所受自有當驥駘雖同程疾徐固其常
走躓滿則溢官何不自量以才較其官自知豈不詳
六藝九流術官曾窺一乎前後官所歷果有裨益無
難免識者譏神目况電如兔罪固恩私此行幸有餘
何不盡誠心官事日孜孜不堪思鄉愁時或出遊爲

叩頭謝叟言惶愧汗沾裾叟言明達理無乃多讀書
叟怒搖手言我性不喜文文人多雕飾空言漫云云
末世文又勝質者吾未聞若文而無質鮮不敗其羣
聞此益矐然斂衽又致辭無乃早學道隱淪老於斯
叟云道何形吾非學道身豈待學而知但知孔聖人
聖人有大道忠君孝於親萬事皆本此推之盡其倫
老佛異其端闢之固亦宜老氏知止足不辱不殆而
佛氏推仁心慈悲思普施我見近世人利慾各自私
普施者有幾知足者爲誰就質兩氏家必更麾斥之
聖道安可希我言庶乎其起敬更請益叟言我不知
歸坐思叟言綴之以爲詩

燈夕觀劍舞

輕陰抵夕雨濛濛夜景初晴火樹中共作羈遊愁却
減從知佳節俗相同竿臨廣野燈如月舞倚高樓劍
似虹遙憶端門珂馬客九街行踏軟塵紅

觀德堂望見村家打麥口吟十絕

前秋穡功儉村儲乏鬻瓶農夫興嗣歲穀雨方春耕
耕田播麥子春凍勒抽芽孟夏方出土幪幪帶雪華
五月惜旱乾六月愁陰霧中庚穗如垂嚇嚇釋憂懼
山田手摘青野田刈成束四隣出牛車肩機輪不足

健夫鎌如飛少婦筐已盈揮打粒如雨須臾積圃塲
彭彭復膈膈前聲應後聲樂在終歲飽寧辭肩臂頰
村碓夜春急昨打今已煇飯高匙列椀酒溢匏泛盆
老翁扶杖觀穉兒藉藁眠狗蹲鷄行啄籬樹籠夕烟
計斛輸賦稅把斗市魚鹽新晴望原野黍粟又豐占
日汝農夫慶適我爲吏時縱愧張堪政樂亦不可支
滌愁軒戲押愁字吟一絕句仍思居是軒者四
時晝夜風雨雪月無非可愁演爲十絕
初若無愁安用滌名言應坐未忘愁不召自來驅復
集無妨喚汝蚊蠅儔

春愁如草日添長印綠經旬懶下床時物牽情惱不

掇桃花輕薄柳顛狂

春

柔條滋綠繞丹亭簾角風微獨醉醒不爲芳華留繾
綣緣何鶯語太丁寧

夏

牢騷索莫不勝秋坐數墻頭螢火流終夜壁虫鳴未
已有何分別不知休

秋

將軍何事薄功名斜景飛騰鬢髮驚不是班生心驟
弱衰年易作可憐情

冬

遲遲夕景下林梢隱几支離午刻交擾擾衆生嫌太
疾肯憐窮旅減分鈔

晝

暝色蒼然何處來一更一夢腸一回誰家銀燭笙歌裏却恨玲瓏唱曉催夜

帆檣欹側軸輪傾噴瀑奔雷不是聲衆籟噓空其類

萬九千九百在寧城風

和烟和霧墨雲堆林畔空廊飛鳥迴斷續霏空長短

色燕江茂峽兩邊來雨

故園欣對雪英飄把作梅花第一宵此地先愁三嶺

阻鄉書遲却四三朝雪

迢迢良夜立多時一片飛心影欲隨思家閒想殊無

已更替家人見月思月

南漢玉泉亭次斗室五古韻

人言保障地戎籌須畫斷綢繆所先講游衍宜來諫
昔哲勤修繕措設鮮冗幻雕斲崇華飾反貽林澗訕
儲庠拋急務濟勝漫自辦我謂各隨時斯論非一貫
投壺與緩帶未必耽游玩制勝在宏籌對壘猶笑看
龍韜苟藏胷琴鶴且可伴時平正休養弛張豈無間
人生貴適意苦樂恒相半役役勞形神對鏡頻愁歎
况復簿牘疲鈴鳴對鷺鴈掃石有蘚逕清澗如惺喚
登亭寄嘯傲少可慰遊宦豈因日涉園蕩情忘外患
大勝庸俗流只飽官廚飯酌泉煮茗茗續題爲亭贊

辛卯冬以年貢上使出都宿高陽

幔亭駐蓋醉金觥
坪路風低繡轂輕
冬至行人先一月
中原萬里起初程
四方敢擬經營力
邇歲頻成送別情
却爲弟兄聯枕約
碧蹄村樹趁烟生

庚子外王考孝簡公以冬至副使赴燕時伯胤翼憲公以義州府尹迎親駕孝簡公作一律識之翼憲公又次其韻聯揭邊州人士尙今稱爲美事其後翼憲公又以副使經義州又次當日韻付揭戊子內兄叅判又以副使和韻付揭三世副使亦仕宦家稀有之事也今余猥膺年貢

上使之啣來留是州敬讀詩板旣切念舊之感又有繼蹟之幸謹次原韻刻付於下

尙說庚年北使輶
彩衣迎節耀遐陬
清名上國持冰操
異蹟邊州講石籌
床下兒孫能繼武
天涯歲月一回頭
長懷獅子圖中意
驅策元期聖渥酬

夜宿溫井野幕屬副价金春山

弘根求和

撫劒豪歌發蒼蒼
野竈烟貂裘積雪裏
玉笛長風前枕上
星辰動床邊
虎豹眠金樽坐
夜色氈幕燭如椽
到柵門洪淵泉尙書

爽周

謝恩竣還殊鄉傾蓋

喜可知也用內閣聯句韻奉贈求和

征役非所恤別離亦可耐脂車望砥道羞肩局促輩
遠遊本殊趨譬味嗜豢菜肆氣資宏博騁矚發秘晦
眩目列貝品蕩志分旗隊而我習慵懦術藝俱蒙昧
遇之將焉施未可該一槩汪汪淵泉子胥襟橫海岱
蚌珠蘊輝采餘者便形穢璨璨雲錦裳炫炫璠珞珮
遊身經籍中棲心名教內發爲大雅音流俗堪砥誨
珍寶豈恒有胡越誰不愛皇都昔放筆彼勇亦懍退
彥國名固重博望行今再崇儀方犀縮清裁自豸戴
昔哲服忠信循蹈無違背古經訂箋註遺乘補紀載
逸步籥驥驤高籌占虛塞鼎彝殷周世鍾簾漢唐代

劔筑遂已空縞紵果誰在北學多迷筏瀾滔而草每
法言爲指南晰晰抉翳礙魯禮與稷風殊俗驚俊乂
我躡如礫後望光懷自慨萬里羈窓夕傾盖欣相對
多君甘獨賢駢駢懷靡逮睂宇遼野濶衣帶巫岑黛
華麗何須問不肯隨俗態請君贈我言佩之庶无悔

瀋陽

帝里繁華瀋水陽青齊舊色野圍長二陵佳氣開皇
業萬堞雄圖鎮塞疆黃幄宮儀同大內金壇將令摠
諸王初年已着經籌遠聞說興京宅八荒

姜女廟

萬杵魚游歌曲聲
鞭頭殘敗幾蒼生
竟來成就范家
婦構得寒祠對古城

娘子前身一片石
繡鞋羅襪望夫時
雲根獨漏驅鞭
外定重丘山動不移

蕭風淒雨助哀聲
那不摧崩一片城
崩時却恐螺山
近更遣郎魂驀地驚

哀絃和淚動叢筠
風珮霓裙漢水濱
淒涼燕舞虫書
跡碧玉苔文翠幌塵

丁年夫婦人幾何
飄沒隨塵劫火過
獨拈七郎留百
代許家終始報郎多

娘豈區區計身後
後人崇飾角山齊
看取振衣亭畔
字六龍迴駕手親題

山海關

金湯盤踞振雄聲
形勝輿圖第一名
關塞極天橫重
鑰風雲接地聳層城
角山影帶紅旗颭
滄海濤含鐵甲鳴
報道將軍兵衛出
分傳繡契管行程

康熙年間陽坡先祖奉使過永平
逢魏伯子談話伯子有贈詩
今過其地追感故事仍次其韻
昔年我家祖奉使入長安
有客停車語相携
秉燭看文章遺俗尚揖讓
古儒冠往跡問何處
荒城風雪寒

魏翁天下士家世江西居詩禮弟兒共襟顏時俗殊
高風說贈劍此地憶停車文藻翠微宅倘能前日如

金鰲玉螭橋

芳杜之汀蘭若洲唐時太液漢時樓鸞笙鳳管聲相
合玉螭金鰲影對流紅袖明粧舖錦水黃門宣喚畫
龍舟綾波翠照煤山色盛代繁華一夢悠

圓明園燈戲

綺疏雕檻夕暉澄殿角雙棚始放燈一道彩繩飛電
火瓊林珠蘂結層層

一燈飛燼萬燈明貝閣銀屏片刻成繞殿忽驚香霧
漲瞥然飛砲作雷聲

珠星錯落戲晴空纖月添輝太液東彩袖蠻童分隊
向豐登五穀字當中
洋國鞦韆回子箏遞將方伎間殊聲故應誇耀皇威
遠統管蠻夷欵漢京

燈船舊貢浙江東錦刻珠縈巧伎窮何苦片時供眼
日千金枉費許多工

十七橋望西山

朝氣西山拄笏看翔龍飛鳳彩雲端玲瓏結綺臨春
意十七橋頭第一欄

繡闥朱甍曲曲通琉璃
徹碧瑪瑙紅全幅
江南樓閣盡夕陽
橫掛淡烟中
門前常繫畫龍舟
明月荷花桂子秋
漢苑離宮三十六
不知何處翠華遊
窓窓戶戶院相當
五步纔移十步強
玉女闕闕仙岳岳
瑤池臨面闢雲間
新春魚藻錦舖池
翠袖行舡玉管遲
一一金花紅榜子
老監閒說上皇時

文丞相祠

叢篠層濤極目憂傷神
腦子五坡頭悲風一日寧
忘國慟哭三年不下樓
獨抗寸心爭彼曠終留片土重
於丘高風更有張生義墓栢
蕭森故國秋

岳武穆祠

朱仙塵漲鐵鎗揮報國
精忠萬代稀痛飲黃龍方勝
筭指揮紅錦自神機
蠟書馳奏言何補金字還催事
已非天意胡然秦尚輩
中原豪傑淚沾衣

盧溝橋望太行山

駕石虹橋古渡灣
欄頭指點太行山
浮雲黃帝勛華處
飛鳥青州海岱間
劇路如今同衆軌
邊籌從古設重關
問誰愁賦桑乾水
却見人從日下還

笙陔蔣翰林

立備

少卿丹林

祥墀

子也父子以

詩筆并名赴約有題

彩花金勝帝城春留醉朱門綠酒茵振代詞聲鳴玉
佩傳家儒術掌丹綸懷從同志常多感交到殊方倍
覺親三選不徒容二仲賴君多結老蒼人

坐有二客而主人姓

蔣余姓鄭

和海帆卓少卿

秉恬

蟳螯詩韻

聞昔宦寄淞江南江南勝槩恣搜探政暇飛鳥相追
隨官齋讌飲鄉味耽秋來蟹戶捕脆爪劈匡咀黃捫
腹飽絕似古人願通判因想為夢夢三泖自別黃堂

悵前塵不獨桂秋桐花春對盤停箸思南烹高情漫

比憶鱸人公無嗜物淡而雅悅之何獨於味也蛭腦

鬻足差可戀當樽煩擬左手把甲馥瑤珠風味豪

贈全

馥江瑤柱故云朶頤細嚼如癢搔生固脆軟乾逾甘吾鄉論

味賤兩螯辨品寧借易牙口截啖堪佐黃公酒恐君

不復笑蔡謨驛使魚書東海走

施生

麟

為其大人督鎮求詩

督鎮名聯科籍家本秦人宦跡多在

楚南辛亥入覲奉召五次賜孔雀翎苗塞之役身經百餘戰又賑飢民今官督鎮年七十遍求朝廷公卿詩文來求於余

書劔當年氣似虹明光謁帝袞褒隆三秦奕葉傳家

遠南楚威名振世雄玉塞防邊紆勝策青州活萬樹
陰功願將長命絲添繡留像麒麟畫閣中

江沛東

淹和

宅會海帆共賦

霽旭舒陽阿藹矚彌芳甸隣交在嘉翰招邀穀朝棟
高軒集深巷肆筵張華譙光誦攀逸韻款酌紆崇眷
煩抱一以紆終夕不知倦相分渺風烟懷哉永縈戀
樊昆吾封李秀才宗淮同住吉祥寺造訪贈詩
玉磬禪林春晝晴指端飛話筆端聲偶從日下曾相
識同客天涯倍有情出入鍾王才子氣縱橫周漢宿
儒名相思夜夜隨清月分照金山紫閣明

海帆與其弟筍山

秉情

其子鶴溪

標

約會見筍

山作畫鶴溪作書仍賦詩代筆談

世間三絕萃公廬筆下文章李杜如願對家中佳子
弟筍山圖畫鶴溪書

酒氣詩香透室廬天涯還覺比隣如我歸要作他年
計收拾先生往復書

翁立本

樹棠

去年隨勅東來余以館伴相見於

雪樓今訪余於玉河臨別贈一詩志緣

明雪南樓畫燭前玉河杯酒又奇緣主賓講禮三宵
竝來往論交兩歲連獨抱高才城市隱曾將傑句海

邦傳驪歌相送知何處薊北春天樹似烟

延恩陳登之叩余姓號年庚官職走筆答之

庭前書帶對經床置驛長安結老蒼却慙伯玉知非
歲宋代南宮漢署香

登之連賦索和書示

詞墨聲名三十秋新詩俊逸孰能儔急從深巷回車
去怕臥元龍百尺樓

登之臨別書懷示之又和

依遲車馬惜分離可奈清風朗月時天涯知己真吾
輩須記登之與善之

馮少渠

震東

滁州人文學盛名行誼甚高以孝

廉薦上京候選少渠思在滁時山中吟詩之趣

作畫一帖朝廷名士本州士人競題詩文名曰

空山吟趣圖因程主事

德麟

來訪余贈其所作

詩集續孝經一冊仍請題一詩於帖中坐次率

爾書贈

朱門兮棨戟雕閣兮錦繡君獨胡爲寂寞空山裏笙
竽兮羅庭瑱璫兮列屋君獨胡爲冷淡吟趣以君乎
學道充然內足無外求朱芾黃冠隨處安素履處不
爲箕山潁水之果哉出不爲烏衣南曲之華矣讀君

書君行會閔高咏君詩君才李杜美上堂怡怡不戚
戚朝耕暮讀家事理興來每獨逞跂石復臨水雲霞
燦爛攢綺羅草樹葱蒨疊翠紫紉石蘭兮帶杜蘅飲
瓊液兮飡琪藥手採三秀澹忘歸舉頭看山看不已
歐翁手植香不沫滁州有歐公手植梅川雲嶺月照裴几拭蘚
重讀長公字萬慮澄清鍾聲起所居東有元時大鍾風檐鬚眉
動抽毫復展紙松籟禽聲相依和不與俗子對陣壘
周雅與楚騷風泱返正始不是堯夫愛吟詩怡情寓
趣聊復爾山玉淵珠光輝掩不得天子聞名蒲輪徵
高士空山兮不可以久留君乎歸來入帝里手持一

幅畫空山丹崖翠壁幽泉竒巖皆相似依然坐君空
翠中逸響朗吟如在耳我聞山人出山便忘山所以
鳥譏而魚嘲林慙而澗恥至人不以榮辱累其心軒
冕丘壑均一視然後進可致君退善身君子行藏用
舍本如是我知君意不在山不在詩願揭此圖兮車
馬之塗雲水之涘

出玉河館次前韻

河水初泮細流彎好是青春作伴還征馬長嘶如解
意行人一笑好開顏羈身摠向今朝健使事相將去
路閒轉轉車輪千里近朝陽門外卽龍灣

漁陽橋

天寶其奈漁陽何橋上一唱長恨歌太宗開國煌煌
業七德歌頌百工和玄宗撥亂御九宇開元之則貞
觀柯丹宸早朝公卿入玉塞無塵海不波一朝選入
楊家女六宮俛首羞綺羅夜夜沉香欄干立海棠睡
起生微渦虢國夫人花滿車墮珥遺珠顏半酖龜年
度曲李暮笛霓裳羽衣影傿傿錦帳銀燭苦夜短鷄
人敢報更籌過不見昭容引朝儀誰復聽漏曳霜靴
廣平騎箕曲江去諫書稀到金鑿坡天陛忽登蕃胡
兒其目眈然其腹臄彤庭宣賜洗兒糲外人附耳不

敢譁長楊一夕烽火急羽書交馳鳴鉦鑼突騎長驅
列郡靡已到關內遍干戈翠華蒙塵西渡渭劍閣棧
道碧嵯峨馬窳坡下六軍駐喙風淒雨變頃俄英主
易忽持盈戒崇極而圯理則那四紀厚德猶在人况
復李郭勇番番馬上親授匡復計回紇平時厚撫摩
縱使金甌竟無缺仙李盛業仍蹉跎從知夏訓戒內
荒有國興衰豈在多吁嗟後王鑑前轍古橋點筆試
一哦

通州

楊湖流接潞河長沙渚烟林繞粉墻隊隊花簪高髻

女雙雙金勒繡鞵郎窓櫳日照南船影珠珮燈明夜
市光聞說園桃堤柳節遊人歌管亞神京

江南船

蘭橈泊渚鏡波開邀客雕欄勸玉杯家本荷花汀上
住舟應楊子水邊來窓櫳帶日丹青映帆纜翻風錦
繡裁金綵榜頭書勅字浙燈親貢御前回

清節祠

首陽山下灤河湄百代清風孤竹祠王武維揚誰諫
者我行安適乃歌之義全仁得惟吾分天與人歸詎
不知莊誕馬夸俱欠實區區身後豈名爲

風前立馬古河濱竹色松聲閱幾春早已弟兄輕讓
位祇知臣主重全倫經權聖暴誰多較虞夏羲軒獨
與親一字太公當日語賢人扶得眎來人

宿紅花店朝登澄海樓是日生朝也副使勸酒

醉成一詩

五更銀燭紅花店朝日鏡波澄海樓兒子玉槃舞彩
服朋僚綠罽飛花籌長吟風度魚龍窟極望烟生吳
楚州萬象玲瓏心眼壯弧盤五十冠今遊

三義廟

紛紛宇內羽書飛大耳王孫一振衣當日君臣何灑

落至今祠廟有光輝片言誓死投心合大策扶亡仗
義歸四百洪基方結局堂堂正氣始終稀

廣寧寧遠伯牌樓

劈窠丹券鐵鉤盤古郭烟雲護石欄唐代虎符諸鎮
帥漢家麟閣列侯官許身獨任重關鑰教子聯登上
將壇見說來仍多俊秀早將功德樹三韓

遼東途中書古蹟示同行

遼東舊屬勾麗界參柳勃碣抵瀋沮慕容畏避鞞鞞
服二千延表青幽介尉巖據險漢陣挫鯉魚包草馳
單价大業百萬出九道赫威凌弱視拾芥宇文浮橋

徙殫力羅郭鳴甲護兒敗乙支妙筭七奏捷贈詩還
說知足戒八輪樓車萬布囊閱旬犄角計漸差貞觀
喜功耀神武手結雨衣六軍邁世勛仁貴雄如虎鷄
鳴駐蹕連柵砦安市孤墉勝金湯臨衝礮石不能壞
帳中慨思魏鄭公草枯水凍奈師憊早識城將才且
勇離支力屈果無恠勅賜百縑獎臣節遙見金鎧城
上拜齊魯大臣惜無傳偉名胡不史策掛明人始稱
梁萬春無奈齊東傳說註隋唐初載皇威壯所指投
降因敢懈天戈屢揮失東隅曳兵班馬圍自解兵強
將良以守戰不獨谿山恃險隘如今兵衛不講古壬

丙狼狽良亦喟安得猛將養豨豨攻敗戰勝使心快
一舉還我舊疆場銅柱劃界醫州屈北之先春南對
馬前代版籍按圖畫

經山集卷二



